

SINTIDI, YINKI NGE KE TUBA SAMU NA MPIMPA?



[Mpangi Gene Goad ke na kutangaka Esaie 21:1-12—Mu.]

[Kizitu ya ntoto ya kuyuma ya mubu. Mutindu kitembo na sude ke luta; na yina ya me katuka na ntoto ya kuyuma, na yinsi ya mpasi.]

[Vision ya mpasi me tubama na munu; mukwamisi ke kwamisa, mpe mubebisi ke bebisa. Mata, O Elam: baka kisika, O Medie; mu me sukisa mawa ya yandi nyonso.]

[Ya kele samu na yina luketo ya munu kele ya kifuluka na mpasi: mpasi me simba munu, mutindu misongo ya kento ke buta: Mu vwandaka ya kukulumusa na kuwa yawu; ba mwangisaka munu na kumona yawu.]

[Ntima ya munu me suka, boma kuzwaka munu: mpimpa ya kyese ya munu balukaka na boma samu na munu.]

[Beno kubika mesa, beno tala na mukengi, beno kudya, kunwa: beno telama, beno bana ya ntinu, mpe beno kusa kinkuti ya nkebolo nzutu.]

[Samu ti mutindu Mfumu me tuba na munu, Kwenda, tula sintidi, ti yandi tuba yina yandi ke mona.]

[Mpe yandi monaka kipusu na minati-mpunda zole, kipusu mosi ya bampunda, mpe kipusu mosi ya bakamela; mpe yandi vwanda kuwa mbote na kieleka nyonso:]

[Mpe yandi bokaka, mutindu Nkosi: Mfumu ya munu, mu ke vwandaka ntangu nyonso na zulu ya yinzo ya zulu na kilumbu, mpe mu ke vwandaka na kisika ya munu ya kisalu bampimpa nyonso:]

[Mpe, tala, awa me kwiza kipusu ya bantu, na minati-mpunda zole. Mpe yandi vutulaka mpe tubaka, Babylone me kubwa, me kubwa; mpe bizizi nyonso ya banzambi ya yandi me mwangana na ntoto.]

[O bantu ya munu, yina ba me bula mutindu mbuma na ntoto ya munu: ti yina mu me kuwa na Mfumu ya makesa, Nzambi ya Israel, mu me tuba na beno.]

[Kizitu na Duma. Yandi ke bokila munu katuka Seir, Sintidi, Yinki nge ke tuba samu na mpimpa? Sintidi, yinki nge ke tuba samu na mpimpa?]

[*Sintidi me tuba, Suka ke na kwiza, mpe dyaka nkokila: kana beno zola kuyufula, beno yufula: beno vutuka, beno kwiza.*]

[Kisika ya mpamba na bande—Mu.]

² Matondo na nge, Mpangi Neville. Mbote na kumona nge dyaka.

³ Mbote, na kalasi ya beto ya Biblia na suka yayi, mutindu beto zola kupesa beno mbote na Nkumbu ya Mfumu Yesu. Mpe mutindu mu vwandaka nata ditoma na nzila kaka mwa ntangu fyoti me luta, na dibuta ya munu, Mu vwandaka banza na bantu yina ke kwizaka na dibuundu na bilumbu ya ndelo mutindu yayi, na yina mvula-mpembe kele bisika nyonso na yinsi, mpasi na nzila. Ba ke kwizaka kaka ve na kumonana. Ba kele na dikani na kukwizaka. Mpe mu kele na kyese mingi na kumona nkonga yayi awa na suka yayi, ti, dyaka, “Lukwikilu ya batata ya beto, ke zinga dyaka,” ke pela na kati ya bantima ya babakala mpe bakento bisika nyonso.

⁴ Ndinga me tangama kaka na nzila ya Mpangi ya beto Gene Goad, na kapu 21 ya Buku ya Esaie, kisika beto ke longuka, mwa ntangu fyoti, mpe na manima beto ke sambila samu na bambevo. Mpe ntangu yayi samu na dilongi, na suka yayi, mu ke zola kubaka kuna, kubanda nzila ya 11 tii na 12: *Sintidi, Nge Ke Tuba Samu Na Mpimpa?*

⁵ Mpe ntete beto kota na kuzonza, beto kulumusa bayintu ya beto kaka mwa ntangu fyoti na kisambu.

⁶ Mfumu Nzambi, Nge kele Nzambi ya batata ya beto. Nge kele Nzambi Yina pemaka pema ya ntete ya luzingu yina kwizaka na zulu ya ntoto, mpe kuzwaka kuyala ya konso luzingu tii na ntangu yayi, mpe ke yala kukonda nsuka. Samu ti Nge kele Mvangi ya bantu nyonso, mpe ya bima nyonso yina ke pemaka. Nge kele Mvangi.

⁷ Mpe beto kele na kyese, na suka yayi, na kukwikila na bantima ya beto ti bansilulu ya Nge kele kieleka, mosi na mosi ya bawu. Mpe ti na bansilulu yayi, Nge me tuba ti kisika zole to tatu me vukana na Nkumbu ya Nge, ti Nge ke vwanda na kati-kati ya bantu ya Nge, mpe ti Nge ke pesa mvutu na lubokilu ya bawu.

⁸ Mpe ya kele na bantima ya kilo bubu yayi. Mutindu tuka mu me kota na dibuundu, mu ke mona bayina na ba-civière to bambeto ya kubela. Mpe bayankaka na maboko ya bawu ya basimisi ya kufutika, samu na ba-mikolobi—ba-mikolobi na maboko ya bawu. Mpe bayankaka, mu me kuwa, ti me zimbisa bankundi ya zola. Mpe, oh, ya kele yinza ya masumu mpe ya yimbi! Kasi, dyaka, bima nyonso yayi fwana vwanda ya kuyala na Mfumu Yesu, Yina tubaka na beto, ti, “Bima nyonso ke sala kintwadi samu na mambote ya bayina ke zolaka Nzambi.”

9 Mpe beto kele ya kubomba na suka yayi, samu na kukwikila ti bima mingi yayi ke nata beto na kufukama. Mpe beto zola kubanza na Masonukwa, ti, “Bayina ke na kuingila na Mfumu ke vutula ngolo ya bawu. Bawu ke mata mongo na mapapu mutindu ngononi. Bawu ke kima mbangu mpe ke lemba ve. Bawu ke tambula mpe ke tekita ve.” Mpe mutindu poète tubaka, “Longa munu, Mfumu. Longa munu, Mfumu, mutindu ya kuingila.”

10 Ti beto, bubu yayi, mutindu beto ke na kuingila na kuwa na Nkembo, mpe na yinwa ya Mvulusi ya beto, na nzila ya Mpeve-Santu, ti beto ke vingila na mvibudulu mingi na kuwa Ndinga ya Yandi kuzonza bima ya luzolo na beto, na nzila ya Ndinga ya Yandi, mpe kuzonzila pardo ya masumu ya beto, mpe kubeluka ya bimbevo ya beto.

11 Mpe bika ti beto katuka tabernacle yayi na suka yayi, na kusepelaka, mpe kutuba mutindu bayina katukaka na Emmaüs, “Bantima ya beto vwandaka pela ve na kati ya beto mutindu Yandi vwandaka zonza na beto na nzila?” Samu ti kieleka beto ke kwikila ti Yandi kele Mfumu yina vumbukaka na lufwa, mutindu bawu monaka Yandi kilumbu yina. Mpe Yandi kele na kati-kati ya bantu. Beto ke lemba ve, bantima ya beto ke lemba ve. Bika kaka ti beto vutula ya malu-malu lukwikilu ya beto, konso ngunga, na Nge. Pesa yawu, Tata.

12 Beto ke lomba Nge na kusakumuna Ndinga ya kusonama. Mpe na kusakumuna makutu yina ke kuwa, mpe bikoba yina ke zonza; mpe Nge mosi kuzwa Nkembo. Samu ti na Nkumbu ya Yesu beto me sambila. Amen.

13 Ya kele ve na mosi ya beto yina kele kukondwa bampasi. Nzambi silaka ve na kulemvokila beto na bimbevo nyonso. Kasi ya kele ya kusonama, ti, “Ngolo ya Yandi kele ya kulunga, mpe Yandi ke tula mingi ve na zulu ya beto kasi yina Yandi ke pesa beto lemvo samu na kunata yawu.” Na yawu beto kele na kubomba yango ya kuzaba.

14 Na dibanza ya masonukwa kaka ntangu yayi, na mwa ntangu fyoti, na kima yina monanaka ti ba tulaka yawu na ntima ya munu bangunga fyoti me luta: *Sintidi, Yinki Nge Ke Tuba Samu Na Mpimpa?*

15 Ya vwandaka mu banza, na kati-kati ya kubwa ya mwini mpe mpimpa. Mpe ya zolaka vwanda kilumbu mosi ya boma na kati ya mbanza, samu ti ya vwandaka na bukebi yina ba pesaka, ti bawu, sintidi na yinzo-zulu, fidisaka bampova ti yandi monaka na ntama fundu-fundu kumata na makulu ya bapusu. Mpe yandi kuwaka kubula ya basabo ya bampunda, kuna ntama.

16 Kasi mutindu bamama zole ya bantwenya zolaka vwanda ya kutelama na dibulu ya maza, mpe na buntwenya ya bawu, na bamvula ya bawu ya buntwenya, bawu vwandaka na mingi ya kubanza, bawu vwandaka banza, ya kulutila yina mpova ya

sintidi yayi vwandaka. Ya lendaka vwanda ya zolaka tuba kima mingi ve samu na bawu, samu ti bawu vwandaka kaka na kitoko ya buntwenya ya bawu. Ya lendaka vwanda samu ti ya zolaka vwanda na feti na nkokila yina, mpe bantwenya ya bakento yayi vwanda zola kuvwanda na feti yayi. Mpe ya monanaka na kuvwanda ti dikebi ya sintidi zolaka kuzwa ve kisika na zulu ya yina bawu vwandaka na makani ya kyese ya yinza na nkokila yina. Na yawu na yina disolo vwandaka landila, mpe—mpe mama mosi ya ntwenya vwandaka tuba na yankaka, “Ya kele yimbi mingi ve, ti, na kilumbu ya beto, ti beto kele na bantu zola kufwa bakyese ya mutindu yayi, muntu yina ke meka na ku—kukatula beto bantangu ya mbote yina beto ke na yawu, mpe na byese yina beto lendaka sepela?”

¹⁷ Mpe mu ke kwikila ti ya ke vwanda kaka pene-pene na mbangulu ya malu-malu ya bilumbu yayi, ti bantu ke meka na kubanza ti ntangu beno ke meka na kukangula meso mpe kulonga bawu samu na boma yina ke na kwiza, ti ba ke banza ti beno kele kaka mwa muntu ya mambu ya ntama, muntu yina ke na kumeka na kukatula kyese nyonso ya luzingu.

¹⁸ Mpe beto lendaka banza dyaka na bantwenya ya babakala, na yina ba vwandaka katuka na yinzo ya ksalu, mpe bizizi ya bawu ya mvindu katuka ksalu yina ba vwandaka me sala na kati ya kilumbu. Mpe ntwenya mosi ya bakala lendaka tuba na yankaka, “Kaka na manima beto me yobila mpe me yilama fyoti, mbote, beto ke kutana na taverne, mutindu ntangu nyonso. Samu ti mu ke kwikila ti nge, Jean, kele ve ya kukwamisa samu na nsangu yango yina beto vwandaka me kuwa bubu yayi, ya sintidi yina na yinzo ya zulu, yandi na kumekaka na kukatula kyese nyonso ya luzingu, na kumekaka na kutuba na beto ti ya vwandaka na boma ke na kubelama. Kasi, beno zaba, beto kele na makesa ya kulutila yina kele. Mpe mingi ya basoda ya beto kele . . . ke kutanaka konso nkokila na kisika mosi yayi yina beto ke kwendaka, mpe beto ke sepelaka na kubundana kintwadi, mutindu kubula bansaka ya bunkundi, mpe kunwa malafu mwa fyoti. Mpe munu, samu na munu mosi,” yandi lendaka tuba, “mu me manga kaka na kukikwamisa samu na mambu nyonso yayi yina sintidi yayi ke zonzila. Samu beto ke kwikila ti kana ya vwandaka na boma ke na kubelama, ti ya kieleka ba-rabbin ya beto—ya beto zolaka zaba yayi, ba-pasteur ya beto, mpe ba zolaka tubila beto na yina me tala mambu ya mutindu yayi. Mpe beto kele na nsatu ve ya kuwa masolo yayi yina ke kwamisa ya sintidi yayi na yinzo ya zulu.”

¹⁹ Mpe kana ya kele ve kifwani ya kulutila nene ya yinsi ya beto bubu yayi, ti bantwenya ya yinsi ya beto, mpe kaka bantwenya ve, kasi bakuluntu ya yinsi ya beto, me kuma kaka mutindu bilawu. Mpe bawu ke manga na kuwa makebi. Mpe ntangu kaka sintidi ya kieleka ke pesa dikebi, ba ke tala yandi mutindu yeza, to mwa fanatiki.

20 Mpe mutindu kilumbu ke na kukuma mpimpa, ya lendaka vwanda ti soda na mwelo, yina ke na kukeba myelo, kukuma mwa ya kidi-kidi. Mpe yandi ke belama na . . . na mpangi ya yandi sintidi, mpe ke tuba, “Nge banza ti ya lendaka vwanda na siansi ti sintidi yina vwandaka ya kusungama?”

21 Beno zaba, ya kele na kima na yina me tala boma, ya kele na kima na yina me tala lufwa, yina ke monana ti yan fwana vwanda na dikebi ya yawu na ntuala. Bambala mingi bayina ya zola, kaka ntete, ba luta lweka yankaka, ya ke monana ti ya ke vwandaka na dikebi ke kwizaka na bawu.

22 Mu lenda banza na tata ya munu, ntete yandi kwenda. Yandi katukaka na Kentucky bamvula mingi. Kasi, na mbala mosi, kima mosi monanaka mutindu ningisaka papa, samu na kukwenda na yinzo ya ntama mpe kusolula na bankundi ya yandi ya zola mpe bankundi ya yandi.

23 Na manima yandi vutukaka na yinzo, mpangi ya yandi ya bakala, yina yandi kuzwaka ve bweso na kumona, kuzwaka nsangu na mutindu ya ngitukulu na kukwiza na Jeffersonville samu na kumona yandi. Mpe na yina bawu vwandaka ya kuvwanda, vwandaka zonza, papa lutaka na yinza yankaka.

24 Mu ke banza na bokilo ya munu ya bakala. Kaka mwa bilumbu ntete yandi kwenda, yandi tubaka, “Billy, bika ti nge na munu kukwenda na kuzomba bampadi, kuna na zulu ya Utica. Mu zola kwenda kaka na kisika yina ya ntama.” Na mutindu nyonso, na yina me tala Nzambi, mu vwandaka ve na lenda ya kukwenda na yandi kilumbu yina. Mpe yandi kwendaka kilumbu yina mpe zombaka, mpe ntangu yandi vutukaka na autobus, yandi—yandi tubaka na munu, yandi tubaka, “Mu vwandaka ya kuvwanda na zulu ya mongo. Nyonso me soba ntangu yayi. Kasi kuna na nsongi mosi ya mfinda, na Battle Creek, kaka na zulu ya beto,” yandi tubaka, “ya monanaka ti mu lendaka kuwa mama ya munu kubokila, ‘Oh, Frankie!’” Na nkokila yina yandi pesaka kimbangi, yandi vwandaka na ndonga ya bakiti ya zole ya dibuundu yayi, na diboko ya munu ya kikento, vwanda zola ti bantu sambila samu na yandi. Mpe mwa bilumbu na ntuala, beto zikaka yandi.

25 Ya ke monana kaka ti Nzambi ke tindaka ntangu nyonso munati-nsangu. Ya kele bumbote ya Yandi mpe lemvo ya Yandi, samu na kupesa kieleka na kati ya ntima dikebi ya bima yina ke na kubelama.

26 Mpe mu kele na kyese mingi ti na kilumbu yayi yina beto ke na kuzingaka ntangu yayi, ti, na yina mawa mpe mpimpa kele pene-pene, ya ke monana ti kivuvu ya kusakumuka ke bula ntima ya bantu ya Nzambi, ti na ngunga mosi ya nkembo Yesu ke kwiza.

27 Mpe na ntangu yayi ya nene ya mpasi, na mbanza yayi, bantwenya vwanda kipe yawu ve, mpe bantu mingi vwanda kipe

ve yina sintidi vwandaka tuba. Ya kieleka, ba vwandaka na taverne, vwanda kunwa, mpe feti vwandaka landila. Mpe basoda nyonso vwanda kunwa. Mpe bawu vwanda kuzwa ntangu mosi ya nene, na kubanzaka ti bawu vwandaka kaka na lukengolo mutindu bawu lendaka vwanda. “Kima mosi ve zolaka talisa bawu mpassi,” samu ba vwandaka ya kukola, mutindu beto ke bokila yawu, na bampeve ya whisky mpe ya malafu mingi ya kuvukisa.

²⁸ Mpe na mbala mosi, kuna me kwiza bapusu me kota mbala mosi na mbanza. Mpe ba me mwangisa myelo ya taverne, mpe bayinzo, mpe minduki ya kufwa bantu kotaka na kusalu, kaka samu ti bawu mangaka na kuwa makebi ya sintidi.

²⁹ Mpe bisalu ya sintidi, na Biblia ya ntama, ya vwandaka muntu yina ba soolaka. Yandi zolaka vwanda muntu yina ke talaka mbote banzutu ya mazulu. Yandi zolaka zaba kaka kieleka kisika bambwetete kele ya kulelika, samu na kutuba ngunga ya kulunga na bantu. Bantu mingi yina vwandaka ya kukwamisa, mu banza, mpe bayina vwandaka lenda ve na kulala, bayina vwandaka na boma, zolaka kwenda na ngaanda, mpe zolaka boka na ngolo na sintidi na yinzo ya zulu, mpe zolaka boka na ngolo bampova yayi, “Sintidi, yinki nge ke tuba sambu na mpimpa?”

³⁰ Mpe yandi zolaka tala bambwetete, mpe na manima yandi vwandaka tuba, “Ya kele ntangu *yayi-mpe-yayi*.”

³¹ Na yina ba zolaka vutuka na mbeto ya bawu, to konso kisika yina ba ke soola na kuzinga, na kuingilaka mwini basika, na yina mpimpa ya kulemba, ya kukwamisa, ya kulembisa zolaka suka.

³² Nzambi vwanda na kyadi! Mu ke kukiyufula kana ya kele ve ntangu, bubu yayi, ti beto bokilaka ve Sintidi ya beto ya nene, “Wapi mutindu mpimpa?” Ya kele na boma ke na kwiza, mpe yinza ya muvimba ke monana mutindu ke ningana na yisi ya kuyala ya yawu.

³³ Sintidi zolaka vwanda mpe na kusalu, bantangu nyonso. Mpe yandi zolaka kebisa bantu na kubelama ya boma. Yina vwandaka kusalu ya yandi, na kutala mbote kubelama ya boma. Mpe yandi vwandaka na zulu ya yinzo-zulu yina ba tungaka na zulu mingi kulutila bibaka. Mpe na yinzo-zulu yayi, na kati kuna, na zulu kuna, yandi vwandaka, na babuku ya astronomie, mpe nyonso yina, samu ti yandi kutala bambwetete mpe kutuba ngunga. Kima nyonso yina vwandaka belama, na ngunga nyonso ya kilumbu, yandi lendaka tuba yawu.

³⁴ Mpe, yandi zolaka mona dyaka ntama mingi kulutila muntu nyonso na zulu ya ntoto. Yandi zolaka mona ntama mingi kulutila muntu nyonso na zulu ya kibaka, samu yandi vwandaka na zulu mingi. Mpe zulu mingi beno ke kwenda, ntama beno

lenda mona. Mpe beno lenda tuba kubelama ya boma, ntama mingi kulutila bayina kele na ntoto.

³⁵ Mpe mutindu Esaie, na kilumbu ya yandi, vwandaka zonza ti Nzambi salaka yandi sintidi. Nzambi ke fwanikisa baprofete ya Yandi mutindu bangononi.

³⁶ Mpe mutindu mu ke longaka bambala mingi na dilongi ya bangononi, ngononi kele ndeke yina lenda kwenda zulu mingi kulutila ndeke nyonso yankaka. Mpe ba fwana sala yandi mutindu yankaka samu na kukuma na kisika yina ya zulu yina yandi ke mataka. Ntangu yayi, ngoy-ngoy lendaka landa yandi ata fyoti ve. Ndeke yankaka ve lendaka landa yandi. Yandi kele ndeke yina Nzambi salaka, mpe ba salaka yandi mutindu yina. Kana ndeke yankaka kumeka na kubaka kisika ya yandi, yandi ke kufwa. Yandi fwana kuzwa mapapu ya ngolo, mapapu ya ngolo. Mpe wapi mbote ya ke sala yandi na kukwenda na zulu mingi kana yandi lendaka ve kumona, vwandaka ve na meso ya mbote ya kumona? Ngoy-ngoy ke vwanda ya kufwa meso na zulu kuna; yandi lendaka ve kumona. Kasi zulu mingi ngononi ke mata, ntama mingi yandi lenda mona.

³⁷ Mpe Nzambi ke fwanikisa baprofete ya Yandi na bangononi. Bawu kele basintidi yina ke mataka zulu mingi, samu ti bawu kumona ntama mingi. Mpe meso ya bawu kumaka ya kimpeve samu ti bawu kumona kubelama ya boma.

³⁸ Mpe Nzambi tulaka Esaie samu na kukebisa bantu ti ya vwandaka na boma vwandaka belama, mpe bawu zolaka kuwa yandi ve.

³⁹ Mpe, bubu yayi, Nzambi kele dyaka na bangononi, to minati-nsangu, to bantu na zulu ya yinzo-zulu, yina ke mataka na Kimekanisme nyonso, mpe ba-bombe atomique nyonso, mpe kusosa-sosa nyonso ya science. Yandi kele na bantu yina kele ya kusala mutindu yankaka samu na dikani yina, bayina ke mataka na bibaka ya Calvaire, na Nkumbu ya Mfumu Yesu, mpe ke telama na zulu ya kulunsi, mpe lenda fidisa Nsangu, “MUTINDU ME TUBA MFUMU.” Kumona ya bawu ya kimpeve kele nene mingi kulutila banganga-Nzambi na tempelo; ntama kulutila muntu ya mpamba ya kondisyo nyonso na luzing; samu ti ba kele ya kusala na mutindu yankaka samu na bisalu yina Nzambi me bokila bawu. Na yina, ya kele mbote mingi na beto na kusala keba na ntangu beto ke kuwa bima yina ke na kubelama.

⁴⁰ Na yina ntangu yayi mu zola kusala nsobolo mwa ntangu fyoti. Mpe ke balula bukebi ya beno na Ntinu ya bangononi yayi, to ya baprofete, to ya basintidi ya yinzo-zulu. Ya kele Mfumu Yesu, Yandi mosi. Mpe kilumbu yayi na kati ya yina beto ke na kuzinga vwandaka nene mingi kulutila kilumbu yina Yandi vwandaka awa, tii, ntangu Yandi vwandaka kaka na bivudi ya kulunsi, Yandi zonzilaka mingi na Nkwizulu ya Yandi ya zole

kulutila na yina Yandi salaka ya kukwenda ya Yandi. Kana beno lendaka sosa-sosa mbote na Masonuku, beno ke mona ti kaka ntete kukwenda ya Yandi, ti Yandi pesaka profesi ya bima yina ke salama na kilumbu yayi.

⁴¹ Yandi zabaka ti ba fwana koma Yandi na kulunsi. Yandi zabaka ti Yandi zolaka tala mpasi, muntu yina zabaka dyambu ve samu na muntu yina zabaka dyambu. Yandi zabaka ti Yandi ke vumbuka dyaka na ntoni, na kilumbu ya tatu. Yandi zabaka ti ya vwandaka ve na bangolo yina lendaka kanga Yandi na ntoni, samu ti Ndinga ya Nzambi tubaka, “Mu ke bika ve Muntu ya Munu ya santu kumona kupola, to dyaka Mu ke bika moyo ya Yandi na difelo.” Mpe ya vwandaka ve na bangolo yina zolaka buka profesi yina. Ndinga ya Yandi ke vwanda kieleka, mpe Yawu ke salama na nsungi ya Yawu. Mpe Yandi tulaka kivuvu na yawu, yina Tata tubaka, Tata vwandaka na kiyeka ya kuzitisa Ndinga ya Yandi.

⁴² Na yina, ntima ya Yandi ya nene yina vwandaka na kati ya Yandi, yina vwandaka Kiti ya kimfumu ya Nzambi, na kati ya ntima ya Yandi Yandi zabaka ti bantangu yayi ya nene ya kumeka ke kwiza samu na kusiamisa bayinsi nyonso, mpe samu na kusiamisa bantu nyonso. Na yawu, kuna, Yandi zabaka ti kyuvu ya nene vwandaka, ve kana Yandi ke vumbuka dyaka, to kana ba ke koma Yandi na kulunsi landila Masonukwa, to ve kana Yandi ke mata na Zulu, mpe Mpeve-Santu ke kwiza. Kasi kyuvu vwandaka, “Ya ke vwanda na lukwikilu mosi ke bikana na zulu ya ntoto na Nkwizulu ya Yandi?” Mpe wapi kisika lukwikilu ke kwiza? “Na nzila ya kuwa Ndinga ya Nzambi.” Yina vwandaka kyuvu ya Yandi. “Ya ke vwanda na lukwikilu na zulu ya ntoto ntangu mu ke kwiza?” Yandi ke kuzwa bantu yina ke kwikilaka Ndinga ya Yandi?

⁴³ Ntangu yayi ntangu beto, na kilumbu yina beto ke zinga, lenda baluka na ba-page ya Ndinga ya Yandi ya kusakumuka, mpe kumona bima ya kieleka yina Yandi tubaka ke salama, ke belama na zulu ya ntoto bubu yayi, bidimbu mpe mambu ya ngitukulu ke na kusalama: “Bantima ya bantu ke na kubwa na boma.” Ya kele “ntangu ya ntembe mpe ya mawa na kati-kati ya bayinsi. Bima ya boma na mazulu,” mutindu ba-soucoupe volante, mpe Pentagon nyonso ya kuningana. “Mpe mubu ke boka, mpe kuningana ya ntoto na bisika ya mutindu na mutindu. Ntima ya bantu ke na kubwa, na boma.” Minduki ya nene ya atomique me kubama, ke na kuingila. Mpimpa mosi ke na kupepa na zulu ya ntoto, yina yinza me zabaka ntete ve.

⁴⁴ Sabala me luta mu kuzwaka bweso ya kutuba na mosi ya bankundi ya munu ya luzolo mpe bampangi, Kapita Julius Stadskev, yina sonikaka buku, *Profete Me Kwiza Tala Afrika*. Mpe Mpangi Julius vwandaka na Californie, kisika yandi ntangu yayi ke na kulonga na kukuma major ya basoda. Mpe yandi. . . . Bawu, bantu ya makesa, bakaka yandi samu na kumekama ya

nene. Mpe bawu sosaka bankoko ya yandi tii mpe bawu zolaka monisa nani vwandaka nkoko ya nkoko ya yandi ya kento, mpe disolo ya bawu mpe banani bawu vwandaka, ntete yandi vwanda na lukutakanu yayi.

⁴⁵ Mpe na yina yandi katukaka na lukutakanu, mpe kwizaka na zulu ya mingo kisika beto vwandaka zinga na mwa bankundi, yandi kutanaka na munu kuna na yisi ya yinti ya genêt, mpe yandi tubaka, “Mpangi Branham, ya kele kima ya kulutula kutita yina nge me kuwaka ntete ve.” Yandi tubaka, “Mu kele na yisi ya ndefi mingi ti mu lendaka tuba ve, to lendaka tuba ata nsangu ve,” yandi tubaka, “samu ti beto kele. . . Ba bakaka beto na yisi ya ndefi mosi. Kasi,” yandi tubaka, “Mu lenda tuba yayi. Basoda ke suka. Bawu ke kuzwa dyaka ve basoda; kaka mikengi fyoti bisika nyonso. Bawu ke kuzwa dyaka ve aviation. Bawu ke—ke lutisa ve ntangu ya bawu na kutungaka bampepo ya mbangu mpe nyonso yina, kana kaka ti ya kele samu na mumbungu. Bawu ke na kukangama kaka na kubyeta buto mbala mosi. Ya ke vwanda na kubeba ya muvimba.”

⁴⁶ Yandi tubaka, “Mpangi Branham, bantu me zaba ve yinki kele binsweki ya bima ya basoda.” Yandi tubaka, “Ntangu ba-officier ya nene yayi vwandaka zonza na kati ya kivinga,” yandi tubaka, “ya kwizaka mutindu mosi ya dituti na zulu ya kivinga, ti mosi ya bantu ya bawu ya nene ya science telamaka, mpe tubaka, ‘Mu ke zola kubaka kipusu mosi ya ntama mpe ngombe ya kento, mpe kuvutuka na manima ya myongo, mpe kukuna samu na munu bilanga ya ba-choux mpe ya bamadeso, mpe kusimbana nyonso yina me tala yawu.’ Oh,” yandi tubaka, “ya zolaka, kana nsangu yayi zolaka basika na bantu, yinza ya muvimba ke kota na muvusu. Boma ke na kubelama.”

⁴⁷ Yandi tubaka, “Bawu kele. . . ke na kukatula bantu ya bawu ntangu yayi na bisanga. Bawu ke na kukatula bantu ya bawu na Angleterre. Mpe bawu kele na ba-barge ya nene mingi ya kuvwanda kuna, na mutindu mosi ya minduki. Mpe bawu ke na kuingila kaka na kubaluka ya ntete ya missile, mpe konso yinsi ke natama na ntangu mosi.” Yandi tubaka, “Ya ke vwanda ve na kitini mosi ya matiti yina ke bikana na zulu ya ntoto, to mingo mosi kasi yina ke ningana na kisika ya yawu. Mpe ya lenda salama na konso ntangu.” Oh, wapi ngunga ya mudidi!

⁴⁸ Mpe bima yayi nyonso yina beno ke kuwaka na yina me tala ba-soucoupe volante. Mpe beno kuwaka masolo na bakala yina, mu banza, mazono, na ladyo, yina ke tubaka ti yandi me tuba na bantu. Mu ke zola ve kukondwa buzitu na muntu yina, kasi sysiteme ya yandi nyonso kele ya kuswaswana na Ndinga. Ya kele kieleka ve. “Mpe ti na Mars, bawu kele ve na lufwa, mpe bawu me kwiza awa samu na kulonga beto mutindu ya kuzwa ve lufwa.” Kasi ntangu ya kumaka ntangu ya kulakisa, yandi vwandaka na ata kidimbu mosi ve, yina ti yandi lendaka siamisa yawu. Kaka dibanza mosi ya mite yina yandi salaka. Mpe, na dibanza ya

munu, ya kele luvunu, samu ti Biblia ke tuba mutindu yankaka na yina yandi tubaka.

⁴⁹ Mu lendaka tuba yina mu ke banza samu na ba-soucoupe volante. Mu ke kwikilaka ve ti yawu kele bivudi. Mu ke kwikila ve ti ya kele mite. Mu ke kwikila . . . Mpe yayi ke sungika yawu ve. Ya kele kaka dibanza ya munu. Mfumu me tuba na munu ve ti yayi kele yina yawu kele. Kasi, na kutalaka na Masonukwa, samu ti Ya kele kisika beto ke mona bima nyonso.

⁵⁰ Yesu tubaka, “Mutindu ya vwandaka na bilumbu ya Sodome, mutindu mosi ya ke vwanda na nkwezulu ya Mwana ya muntu.” Mpe na ntuala ya kubeba ya Sodome, mpe kubwa ya tiya mpe kuyoka ya mbanza mpe bandimba, ya vwandaka na Bawanzio yina ba fidisaka na Mazulu, bayina talaka na kati mpe sosaka, samu na kutala kana bima yayi vwandaka kieleka to ve. Mpe ya ke vwanda kaka ve mutindu Nzambi samu na kuvutula Bawanzio ya Yandi samu na kufyongonina mpe samu na kutala, kaka ntete kubeba ya nene kusalama? Mpe beno talaka? Ya vwandaka na Wanzio mosi Yina kwizaka, Yina kwendaka tala bakala mosi ya kiboba yina bakaka lukanu samu na Nzambi, mpe vwandaka zinga, ya kyadi na yinza, na kati ya tenta na zulu ya ntoto ya kuyuma, samu muntu mosi me soola mpe me baka bimvwama ya yandi nyonso. Kasi yandi tubaka, “Ya kele nyonso ya kulunga. Mu ke vwanda kaka awa na luzolo ya Nzambi.”

⁵¹ Mu ke zola mingi kuvwanda na kati ya luzolo ya Nzambi kulutula na kuzwa mbongo nyonso yinza lendaka lakisa munu na plato.

⁵² Mpe kaka na ntangu lukanu yina ya nsuka kusalamaka, kuna Wanzio ya Mfumu kwizaka na Abraham mpe tubaka, “Tala esete, wesete, node, mpe sude. Ya kele nyonso ya nge, Abraham.”

⁵³ Masonukwa ke tuba na beto, “Kyesa na bantu ya lembami: samu ti bawu ke byadila ntoto.” Wapi luswaswanu ya ke sala? Bima nyonso ya ntoto ke kufwa na ntoto, kasi Nzambi lenda ata mbala mosi ve kufwa.

⁵⁴ Mpe mu ke kwikila mutindu, mu me twadisama na kukwikila, ya kele, kana foto ya Wanzio ya Mfumu Yina ke kwiza mpe ke sala kuswasikisa . . .

⁵⁵ Beno me tala Wanzio Yina kwizaka na Abraham? Yandi pesaka mukongo ya Yandi na tenta, ntangu Yandi vwandaka zonza na Abraham, mpe tubaka, “Mu ke zitisa nsilulu ya Munu na nge.”

⁵⁶ Oh, wapi Nsangu ya Wanzio ya Nzambi na kilumbu yayi, Nani ke zitisa nsilulu ya Yandi! Kukondwa lukwikilu nyonso ya yinza, bantu ya ntembe, bantu ya ntembe na lukwikilu, mpe bantu ya kukwikama ve, mpe mimpani, ke kanga ata mbala mosi ve Ngolo ya Nzambi. Ya ke salama kaka mutindu mosi.

57 “Mu ke bambuka moyo na nsilulu ya Munu, mpe Mu ke sala nsilulu ya Munu mbote.” Mpe Sarah sekaka na kati ya tenta na manima ya Yandi.

58 Mpe na mukongo ya Yandi ya kubaluka na tenta, Yandi tubaka, “Samu na yinki Sarah me seka?”

59 Mpe Sarah me basika mpe me tuba, “Mu me seka ve,” samu ti yandi vwandaka na boma.

60 Wapi mutindu ya Muntu vwandaka yayi? Mu ke kukiyufula wapi mutindu ya Sintidi yayi vwandaka na zulu ya yinzo ya zulu kuna? “Wapi mutindu ya bumuntu kele yayi na beto, na mukongo ya Yandi ya kubaluka na munu, mpe kasi me zaba ti mu me seka, na kati ya tenta?” Beno bambuka moyo, Yandi vwandaka Sintidi.

61 Mpe Yandi balukaka, mpe Yandi tubaka, “Yinga, nge vwanda me seka.” Mpe yandi vwandaka na boma.

62 Ntangu yayi, beto ke mona dyaka, ti na kilumbu yayi kaka na ntuala ya Nkwizulu ya Mfumu, Bivangu yayi mosi ke vutuka dyaka. Mpe mu ke kukiyufula, mutindu beto ke tala bisika nyonso mpe ke mona nkadulu ya Bawu, kutala mbote yina Bawu ke na kusalaka, mpe mu ke kukiyufula kana bima mingi yayi ya mistiki kele ve kieleka yina Yesu tubaka ke salama. “Ya ke vwanda na bidimbu na mazulu. Mpe na ntoto ya ke vwanda na kyadi na kati-kati ya bayinsi, ntangu ya maketi-keti, kuningana ya ntoto na bisika ya mutindu na mutindu, mpe babakala ke kufwa na ntima ya kubwa.” Bakento ve; babakala. Bakento ke kufwaka ve bambala mingi na mpassi ya ntima. Ya kele babakala. Ya ke lungisa yina Yesu tubaka ke vwanda. Ya kele kieleka yina Yandi tubaka ke vwanda.

63 Mpe na yina mutindu beto lendaka landila, ngunga na manima ya ngunga, na zulu ya bapofete nyonso, mutindu bawu pesaka profesi ya kilumbu yayi. Yina ke sala ve muntu mosi kuboka, “Sintidi, yinki nge ke tuba samu na mpimpa?”

64 Pentagone kele ve na mvutu. Etats-Unis kele ve na mvutu. Allemagne, Russie, ata mosi ve na kati ya bawu kele na mvutu. Science kele na mvutu ve.

65 Nani kele na mvutu? Sintidi, yina kele na zulu ya kibaka, kele na mvutu. “Sintidi, yinki nge ke tuba samu na mpimpa?” Mpe Mpeve-Santu kele Sintidi yina ke na kukumisa ya kukubama bantu, mpe ke na kupesa makebi ya Nzambi. Yandi kele ya kutula mutindu Sintidi. Beto ke mona bambevo kubeluka, meso ya bampofo kuzibuka, makutu ya bantu ya kufwa-makutu kuzibuka, bikata kutambula, bikata kuluta . . . kudumuka mutindu mbambi. Ya ke na kulungisa . . . Yinki ya kele? Ya kele Nkwizulu ya Mfumu, kulandila na kukwenda na ntuala.

66 Mpe bima yayi nyonso, mpe makebi yayi! Mpe bantu ke landila kaka na kukwenda tii na bafeti ya bawu ya ba-bière, tii

bawu ke kota na bantangu ya bawu ya bulawu. Mpe bawu ke banda na kuseka. “Mpe bawu ke bina, mpe bawu ke kudya, mpe bawu ke kunwa, mpe bawu ke kwelana, mpe bawu ke pesama na makwela,” kaka mutindu Nzambi tubaka ti ya ke vwanda. Ata nzila ve ya kukanga bawu.

⁶⁷ Na yina kana beno tala, na nsungi yayi ya nene ya dibuundu, landila Apocalypse 3, na nsungi yayi ntangu yayi ya kele mosi yina ba pesaka Mbwetete ya Suka, kaka na ntwala ya Nkwizulu.

⁶⁸ Beno tala mbote mutindu Masonuku ya Esaie vwandaka ntangu yandi tubaka, “Sintidi, yinki nge ke tuba samu na mpimpa?” Yandi tubaka, “Suka ke na kwiza, mpe mpimpa mpe.” Yinki? Suka ke kwiza, kasi mpimpa ke kwiza na ntwala ya suka. Yinki ya vwandaka? Muntu nyonso zaba ti kaka ntete kilumbu kutalana, kaka na bangunga ya kubelama ya kilumbu, ya ke kumaka mpimpa mingi kulutila yina ya vwandaka ntete.

⁶⁹ Oh, bankundi ya munu, beno kuwa MUTINDU ME TUBA MFUMU. Kana beno ke tala munu kuvwanda kisadi ya Yandi, ya kele kaka na ntwala ya kutalana ya kilumbu. Ya kele samu na yina mpimpa yayi ya boma kele na zulu ya ntoto. Ya kele kaka na ntwala ya Nkwizulu ya Mfumu Yesu. Ya kele dyaka ve na kivuvu me bikana na kima yankaka kasi Nkwizulu ya Yandi.

⁷⁰ Bayinsi ke telemina bayinsi. Mpe bawu me yiba na laboratoire ya Nzambi tii bawu me kuzwa ngolo ya kufula mosi na yankaka na bombi atomique. Mpe bawu kele bantu ya yimbi, mpe bawu kele bantu ya kukondwa lukwikilu, mpe bawu kele mutindu Klisto ve. Mpe mitifi kaka yina kele na bawu, mpe dibanza, kele kubebisa. Mpe bawu me twadisama na wanzio ya kubebisa yina ba fidisaka na mazulu samu na kutwadisa bantu yayi.

⁷¹ Beno bika mu tuba, na Nkumbu ya Mfumu Yesu, ba me fidisa Mpeve-Santu mutindu Sintidi na zulu ya yinzo ya zulu. Mpe mutindu bantu ke boka, “Wapi mutindu mpimpa?” Beno me lemba luzingu yayi? Beno me lemba disumu? Beno me lemba ba-cortege ya mafwa, mpe kubela, mpe yimbi bisika nyonso? Ti mpimpa me vwanda yinda mpe ya kulemba? “Yinki nge ke tuba samu na mpimpa, Sintidi?”

Yandi tubaka, “Suka ke na kwiza.” Beno me mona mbombolo?

⁷² “Mpe mpimpa mpe ke na kwiza.” Yinki mutindu mpimpa? Beno tala mutindu na ngwisani ya kulunga na Masonukwa, Esaie vwandaka. Na kieleka ya—ya nkadulu ya ntangu nyonso, ti ntangu nyonso kubelama ya mwini ke vukanaka mpimpa kintwadi mpe ke salaka yawu mpimpa. Ya kele mpimpa mingi na ntwala ya kilumbu kulutila ntangu nyonso yankaka na mpimpa. Samu na yinki? Ya kele nsemo ke belama yina ke na kusalaka yawu mpimpa.

73 Mpe ya kele kubelama ya Mfumu Yesu ntangu yayi yina ke na kunata mpimpa yayi na zulu ya ntoto. Yandi tubaka ve, “Ntangu bima yayi ke banda na kusalama, beno telemisa yintu ya beno, samu ti mpulusu ya beno me belama?”

74 Palestine kele yinsi. Ba-Juif me vutuka bisika nyonso na ntoto, mpe ba me tula bawu kuna samu na kumona Yandi kukwiza, mutindu Nzambi tubaka ti bawu ke sala. “Beno longuka kingana ya yinti ya fike, ntangu ya ke basisa makasa ya yawu.” Yandi tubaka, “Mutindu mosi ya ke vwanda ti nsungi yayi ke suka ve, ke zimbana ve, ya ke suka ata fyoti ve, tii kuna bima yayi nyonso ke salama.” Wapi nsungi? Nsungi yina ke mona yinti ya fike kubasisa makasa ya yawu. Israël ke vwandaka ntangu nyonso yinti ya fike.

75 “Yina makelele bikaka, mangolo kudyaka,” tubaka Joël. “Yina mangolo bikaka, misopo kudyaka. Mpe yina misopo bikaka, makonko kudyaka.” Mpe kana beno ke tala, ya kele nkoko-tufi mosi. Mosi na mosi ya bitutu yango yina kudyaka yinti na yisi, kele kitutu mosi, kaka na kitezo ya kuswaswana. Mpe disumu mosi mpe kukondwa lukwikilu yina bandaka na kudya ba-Juif, ti, “Yesu vwandaka ve Klisto,” yina kudyaka yinti yina na musisa ya kuyuma. Mpe profete monaka yawu, mpe yandi dilaka. Kasi Mfumu tubaka, “‘Mu ke vutula,’ tubaka Mfumu, ‘bamvula nyonso yina mangolo, mpe makonko, mpe makelele kudyaka.’”

76 Mpe samu na mbala ya ntete na bamvula makumi zole na tanu, ba-Juif ke na kuvutukaka na yinsi ya bawu. “Nsungi yina ke vwanda ve ya kufwa, ke luta ve, tii bima yayi nyonso ke salama.” “‘Kuna mu ke mwangisa Mpeve ya Munu na bilumbu ya nsuka,’ tubaka Nzambi, ‘na zulu ya bana ya Munu ya babakala mpe bana ya bakento, mpe ba ke pesa profesi. Mpe mu ke lakisa mambu ya ngitukulu.’”

77 Bambevo me beluka, bangolo ya nene me salama, na nzila ya Mpeve mosi yina vwandaka mpe lendaka tuba na Abraham ti Sarah sekaka na kati ya kivinga na manima ya Yandi.

Kuna beto ke boka, “Sintidi, yinki nge ke tuba samu na mpimpa?”

78 Mpe yandi tubaka, “Mpimpa ke na kwiza.” Beno tala mbote. Mpimpa, ntete. . . Suka ke kwiza, ntete. Na manima, mpimpa, mpe.

79 Kaka ntete mbandukulu ya kilumbu, ya kele ntangu nyonso na nsemo mosi ya nene yina ba ke tulaka ntangu nyonso na mazulu, mpe yina kele mbwetete ya suka. Ntangu beno ke mona mbwetete ya suka ke sema, mingi mpe mingi, na manima ntoto ke kuma mpimpa mingi mpe mpimpa mingi. Mpe ya kele samu na yina ya ke sema mingi, ya kele samu ti ntoto kele mpimpa mingi.

⁸⁰ Mpe Dibuundu ya bilumbu yayi ya nsuka, bayina ba bokilaka na kubasika mpe Nzutu ya Klisto yina ba soolaka, ba silaka bawu na nzila ya Biblia ti Yandi ke pesa bawu Mbwetete ya Suka.

“Sintidi, yinki nge ke tuba samu na mpimpa? Yinki ke salama?”

⁸¹ Yawu yayi. Kubeba nyonso ke na kwiza na yinza ya muvimba. Kasi ntete ti kubeba nyonso kusalama, Dibuundu ya Yesu Klisto ke kwenda na Enlevement, samu na kukutana na Mfumu ya Yandi.

⁸² Yinki ke sala mbwetete ya suka? Yinki ke salaka bambwetete kusema mingi na ntangu yina? Ya kele kubelama ya mwini. Mbwetete ya suka ke na kulakisaka nsemo ya mwini. Bambwetete yankaka ke monana ya kulemba na ngunga yina.

⁸³ Ba-theologie nyonso yina muntu salaka, madidi nyonso, baluswaswanu ya mitindu ke yuma. Kasi sintidi yina ya kuvwanda kuna na zulu ya yinzo-zulu, na Mbwetete ya Suka, ke lakisa Nsangu ya kieleka ya Mfumu Yesu yina ke belama ntama mingi ve, samu ti Yandi ke sema mpe ke sema mingi, ntangu nyonso, na yina mwini ke bandaka na kubasika.

⁸⁴ Oh, mu ke tuba, bambwetete ya suka, beno telama mpe beno lezima na nkembo ya Nzambi, samu ti kubelama ya mudidi ya kati-kati ya mpimpa kele na zulu ya ntoto, mpe mpimpa ya nene na zulu ya bantu. Kasi suka ke na kwiza, mpe bambwetete zolaka pesa bansemo ya bawu.

⁸⁵ Beno banza na ngunga yina ya boma yina ke kutana yinza ya muvimba. Beno banza na mpimpa yina ya boma yina kele na ntuala ya konso muntu yina me vuluka ve bubu yayi. Bayinsi nyonso, mpe myongo nyonso, mpe bilanga nyonso mpe bayinzo nyonso yina ba vwandaka kembisa, ba ke sala yawu putulu, na mbombi ya volcan dyaka, na mwa ntangu fyoti, na mbwetolo ya disu.

⁸⁶ Kasi bayina ke zolaka Mfumu, bayina kele na Nsemo ya Mbwetete ya Suka, ti bawu ke na kuzwaka—ke na kuzwaka meso ya bawu na Yandi, mpe na ngaanda ya bima ya yinza! Mpe mutindu Paul sonikaka na mukanda ya yandi ya nsuka, ntete yandi katuka ntoto, yandi vwandaka ya kulemba, mpe kidi-kidi, mpe ya kulemba. Oh, mutindu mu ke kuwaka mawa samu na mwa Juif yina. Ntangu yandi tubaka, “Ti ata dyambu mosi ve kukwamisa munu. Mu me nwana bitumba ya mbote, mpe mu me manisa kukima ya munu. Mu me kangama na lukwikilu. Mpe ntangu yayi ya kele na yimpu ya ludedomo yina Mfumu Zuzi ya kusungama ke pesa munu na kilumbu yina.” Na yina yandi banzaka na bambwetete ya suka yina vwandaka kwiza, yandi tubaka, “Kaka samu na munu ve, kasi na bayina nyonso

ke zolaka kumonika ya Yandi.” Oh, “Beno telemisa bayintu ya beno, mpulusu ya beno me belama.”

⁸⁷ “Sintidi, yinki ke sala ti zulunale kutuba mutindu yayi? Yinki ke sala ti science kuvwanda na boma ya kutambula? Yinki ke sala ti Pentagone kuvwanda na boma ya kubasisa nsangu?” Samu ti bantu zolaka kukifwa mpe kulosa mbongo ya bawu na babala-bala, mpe nyonso yina. “Yinki ke . . . Yinki kele dyambu? Yinki ya kele? Wapi mutindu mpimpa?”

⁸⁸ “Suka ke na kwiza.” Ya kele kieleka. Yinki ya kele? Ya kele kusala ya suka, ke na kukwizaka, mpe ya ke na kukwenda na ntwala na Nsemo. Ya ke na kusala mpimpa ya nene kukwiza kaka na ntwala Nsemo kulezima.

⁸⁹ Mu kele na kyese mingi na kuvwanda Muklisto. Mu kele na kyese ti mu kele sintidi ya Yandi, mosi ya bawu, yina kele ya kutelama na kibaka, ke boka, “Beno kubama na kukutana Nzambi, samu ti ngunga ya Nkwizulu ya Yandi me belama.”

⁹⁰ Mpe beno, awa na yinzo-Nzambi yayi na suka yayi, kana ya kele na mosi yina kele mbote ve ti Mbwetete ya Suka ke lakisa Nsemo ya Yawu na kati ya ntima ya beno, Mpeve-Santu ya nene, ti beno kubama samu na yawu. Samu ti ya kele na dyambu mosi ya kulutula nene yina me salamaka ntete ve, ya kele kaka pene-pene ntangu yayi. Beto kele na simu ya kima, na kumonaka kima mosi kusalama.

⁹¹ Munu bambala mingi me talaka bafilme, mutindu na Hollywood mpe na bisika yankaka, mutindu bawu ke salaka ba-scene ya bawu. Mpe mutindu bawu ke bakaka ba-vedette ya bawu, mpe nyonso yina ya bawu, mpe ke yidika bawu. Mpe mutindu bawu ke longaka bawu mpe nyonso na ntwala scene ya nene kusalama. Mu ntangu nyonso ke yitukaka na kutalaka yawu, mpe na kuzabaka ti ya kele bilanda-landa.

⁹² Bima nyonso ya bilanda-landa kele ya kusala na bima ya kieleka. Ya lenda vwanda ve na dollar ya luvunu ti ya kele ve na mosi ya kieleka. Ya lenda vwanda ve na muntu ya luvunu kana ti ya kele na Muklisto ya kieleka. Ya lenda vwanda ve na nsangu ya luvunu kana ti ya kele na Mosi ya kieleka. Ya lenda vwanda ve na nkokila kana ti ya kele na kilumbu. Kieleka!

⁹³ Mpe na yina mu ke vwanda na kutalaka bawu kusala ba-scene ya bawu, mpe mu vwandaka banza, “Oh, beto kele ya kutelama zulu mingi na yinzo-zulu, ntama mingi na zulu ya nyonso na yinza yayi, mpe beto ke na kutala mbote zole ya bima ya kulutula nene; kubasika ya ntangu, mpe Nkwizulu ya Mfumu.” Ntama mingi ve, “Ntangu ke vwanda dyaka ve.” “Ya ke vwanda dyaka ve na ntangu,” mpe Nkwizulu ya Mfumu.

⁹⁴ Mpe mbeni ya Klisto, yandi kele na bantu ya yandi ya kuvwanda kuna. Yandi kele na communisme. Yandi kele na ba-isme ya kuswaswana: yandi kele na malongi ya dibuundu, yandi kele na malongi ya Catholique, yandi kele na malongi ya ba-

Protestant. Yandi kele na nyonso ya kuvwanda, samu na kusala scene ya nene.

⁹⁵ Kasi mu kele na kyese mingi ti ya kele na Tata na Mazulu, Yina kele na bantu ya Yandi ya kuvwanda, mpe, samu na scene yayi ya nene. Na ntangu mbeni ya Klisto ke nata baya yandi na lufwa yayi ya bima nyonso, tii na ntangu, Nzambi me kubama na scene ya Yandi na kunata Dibuundu ya Yandi na Seko, na bitezo ya lusakumunu ya Seko, na Nzambi Yandi mosi. Na yina, banzutu yayi ya ntama ya yimbi ke soba mpe ke kuma mutindu na Nzutu ya Yandi Mosi ya nkembo, mpe nzutu yayi ya kubeba ke lwata yina ke kufwaka ve, mpe na mutindu ya Yandi beto ke telama kukonda nsuka.

⁹⁶ Beno tala! Beno bayina ke talaka televisyo, beno bayina ke kuwaka ladyo, beno bayina ke tangaka bazulunale ya beno, beno bayina ke zolaka kuwa bansangu mpe beno ke kukiyifulaka yina yayi kele, beno kuwa ndinga ya munu: “Suka ke na kwiza, mpe mpimpa ke na kwiza mpe.” Suka ke na kwizaka samu na bayina me kubama samu na suka, mpe mpimpa ke na kwiza samu na bayina me kubama ve samu na suka. Bika ti Nzambi kuyidika bantima ya beto bubu yayi.

⁹⁷ “Samu ti suka ke talana ya Seko mpe kitoko.” Mpe mutindu poète tubaka, “Bantu ya Yandi yina ba soolaka ke vukana na bayinzo ya bawu na zulu. Ntangu ba ke bokila na zulu kuna, mu ke vwanda kuna.”

Beto sambila.

⁹⁸ Na ngunga yayi ya mpimpa na zulu ya ntoto, mpe kubeba bisika nyonso, Mfumu Nzambi, beto kele. . . Beto lenda kaka ve kutuba mutindu beto ke kuwa, mpe kuvutula matondo mpe matondo nyonso na kati ya ntima ya beto, ti Yesu Klisto kulumukaka na Nkembo, mpe kumaka muntu mutindu beto, zingaka na kati-kati ya beto. Mpe na yina ntangu Yandi kufwaka samu na masumu ya beto, lutilaka na nzila ya Paladiso, mpe bakaka myoyo yina vwandaka vingila, bukaka ngolo nyonso ya kimpeve yina dyabulu kangaka ntoto, mpe salaka nzila, na yawu nsemo ya mwini ya lemvo ya Kukonda nsuka ya Nzambi lendaka lezima na zulu ya bayina me zola kuzwa yawu.

⁹⁹ Nzambi, sala bubu yayi, ti bantu bisika nyonso ke kwiza nswalu, ke kwiza nswalu, na kukota na Kimfumu, samu ti Nsangu ke vwandaka ntangu nyonso ya nswalu. “Beno sala nswalu, beno sala nswalu, beno basika!” Wanzio tubaka, na Sodome, “Mu lenda sala kima mosi ve tii nge ke basika awa.” Mfumu, pesa, ti ata ti Nsangu kele ya kufuluka na lemvo, mpe ngolo, mpe zola, kasi ya kele ya nswalu. Pesa, Mfumu, ti bantu lendaka kwiza na nswalu mpe kuzwa Klisto mpe kuvwanda ya kufuluka na Mpeve-Santu. Samu ti Yesu tubaka, “Bawu yina kele ya Nzambi, ke kuwaka Bandinga ya Nzambi.” Ti bawu kwiza mpe bawu fungula masumu ya bawu, bawu baka mbotika

na Nkumbu ya Mfumu Yesu, samu na mulemvo ya masumu ya bawu, mpe kuvwanda ya kifuluka na Mpeve-Santu; samu na kuyidika moyo ya bawu na mutindu dibuundu ya ntete vwandaka, mutindu mosi ya ke vwanda ntangu Nge ke kwiza.

¹⁰⁰ Beto ke vutula matondo samu na Nsangu, mpe beto ke sambila ti Nge ke sakumuna Yawu, Mfumu, samu na bumbote ya bantima ya beto, na yina beto ke vingila na Nge. Na Nkumbu ya Yesu beto ke sambila. Amen.

¹⁰¹ [Kisika ya mpamba na bande. Pianiste me banda na kubula *Ntangu Bawu Ke Bula Bangunga ya Wolo*.—Mu.]

Mosi na mosi beto ke kota na mwelo,
Kuna kuzinga na bantu yina ke kufwaka ve,
Ntangu ba ke bula bangunga yina ya wolo
samu na beno mpe munu.

¹⁰² Beno zola kaka Yandi ve? Ntangu yayi, nsangu me manisa, beto sambila kaka Yandi mutindu yina, na Kimpeve. Kaka . . . Yandi kele awa. Bampova ya nene, ya ngolo, kasi ya kele kieleka. Mu me zonga yawu na Nkumbu ya Klisto. Kubelama ya kilumbu. Kana beno ke tala na munu . . . mu zola yayi . . . [Kisika ya mpamba na bande—Mu.]

. . . nge na munu.

Beto telemisa kaka diboko ya beto.

. . . beno kuwa . . .
Beno ke kuwa ve Bawanzio kuyimba?
Ya kele Zibile ya nkembo aleluya.
Na yinsi yina ya ntama ya mbote ya ntangu
nyonso,
Kaka na manima ya nzadi yina ke lezima,
Ntangu ba ke bula bangunga yango ya wolo
samu na beno . . .

¹⁰³ Na yina yandi ke bula yawu dyaka, ti beto pesana kaka maboko na muntu pene-pene ya beno! . . . ? . . .

. . . yinsi ya mbote ya ntangu nyonso,
Kaka na manima . . .
Ntangu . . . ke kuma kaka kisika yina na nzila
ya lukwikilu . . .

¹⁰⁴ Beno tuba kaka na mosi na yankaka, “Kizyeti, mu kele na kyese mingi na kuvwanda na nge.”

. . . ntangu beto ke kota na mwelo,
Kuna kuzinga na bantu yina ke kufwaka ve,
Ntangu ba ke bula bangunga yina ya wolo
samu na beno mpe munu.
Beno ke kuwa ve bangunga ntangu yayi
kubula?

Beno ke kuwa ve Bawanzio kuyimba? (Yinki ya kele?)
 Ya kele Zibile ya nkembo aleluya.
 Na yinsi yina ya ntama ya mbote ya ntangu nyonso,
 Kaka na manima ya nzadi yina ke lezima,
 Ntangu ba ke bula bangunga yango. . .

¹⁰⁵ Yina me nata kaka kima mosi na mabanza ya munu. Kento ya munu, na manima kuna, ke bambuka moyo na yawu mbote. Mu kuzwaka bweso ya kukwenda tala dibuundu Pisgah ya ntama, lukolo ya Biblia ya Californie. Mu kuzwaka lukutakanu mosi ya nkokila na bawu. Yina kele yinzo ya ntama, ya ngolo ya kieleka. Wapi kisika ya kulutula kitoko! Mu kutanaka na pasteur, Mpangi Smith. Beno zaba, ba ke basisaka bazulunale. Ba ke kuzwaka lusalusu. Ba ke bakaka makabu ve. Bima nyonso kele ya mpamba. Mpe bawu ke zinga tuka bamvula makumi tanu na kima mosi. Ya bandaka na dokotolo mosi yina vwandaka kikata, yandi kwizaka na Californie samu na lusalusu. Dokotolo tubaka, “Kima mosi ve lenda salama samu na nge.”

Mu banza ti ya vwandaka Docteur Price to muntu mosi, yina sambilaka samu na yandi, na zulu, na kivinga mosi, na suka mosi. Yandi kuzwaka ve bandandu, na kutala, kaka kuna. Yina zolaka kutuba kima mosi ve. Na yawu, yandi bandaka. Yandi tubaka, “Na mutindu nyonso, yankaka, mu ke kwikila, ata mutindu yina.” Mpe na yina yandi bandaka na kutula dikulu ya yandi na trottoir, dikulu ya yandi ya kikata me yilama. Yandi salaka Yinzo Pisgah.

¹⁰⁶ Nkokila yankaka yina mu vwandaka kuna, vwandaka longa. Ba vwandaka ya kufuluka na kivinga yina ya nene, mpe bankama na bankama vwandaka ya kutelama bisika nyonso na babala-bala mpe nyonso, mpe bawu vwandaka na manima. Mpe na manima Nsangu me manisa, kima salamaka, bima zole yina mu me pesaka ntete kimbangi ata mbala mosi ve na luzingu ya munu. Ba vwandaka kaka ve nkonga ya bantu yina vwandaka zola kusala makelele mingi. Ba vwandaka ve nkonga ya bantu yina vwanza vwandaka, ya kuyuma. Bawu vwandaka bantu ya kufuluka na Mpeve. Mpe mu sepelaka na kubundana yina ya kitoko. Mpe ntangu beto vwandaka. . .

¹⁰⁷ Kaka ntete mu sambila samu na bambevo, bawu bandaka na kuyimbila kima mosi ya kitoko mutindu yina. Mpe mu telemaka, mpe mu vwandaka ya kuyituka. Mu tubaka, “Ya kele na kima mosi ke na kusalama awa. Mu ke bakula ve.” Mu kuwaka dyaka, mpe mu kuwaka ba-chorale zole. Mu tubaka, “Ya fwana vwanza na kima mosi ke tambula mbote ve.” Mpe mu ningisaka yintu ya munu. Mpe, na makutu ya munu, dyaka. Mu tubaka, “O Mfumu, ya lendaka vwanza ti ya kele kuwakana ya chorale yayi awa.” Mu ke kuwa yankaka awa, kuna, na zulu, na zulu mingi. Mu tubaka, “Ya fwana vwanza na zulu kuna.” Na yawu mu basikaka na

dibulu ya milongi, mu mataka awa tii na chorale. Ya vwandaka na zulu kuna.

Mpe mu—mu tubaka na kento ya munu, mu tubaka, “Nge ke na kuwa yawu, cherie?”

Yandi tubaka, “Yinki yina?”

“Mpangi-kento Arganbright,” mu tubaka, “nge ke na kuwa yawu?”

Yandi tubaka, “Yinga. Mu me kuwaka yawu mbala mosi na ntwala, na luzingu ya munu.”

Mu kwendaka kuna na Mpangi Arganbright, “Nge ke na kuwa yawu?”

“Yinga.”

¹⁰⁸ Bantu nyonso na bayintu ya bawu ya kukulumusa, ke yimbila. “Oh,” mu tubaka, “mu banza . . . Mu—mu zola vwanda na kieleka. Mu zola ve kuvwanda na maketi-keti, kasi, Mfumu, kana mu kele mbandi ya Nge, kana mu kele sintidi, mu fwana zaba yina mu ke na kutubila. Mu fwana vwanda na kieleka na yayi.”

¹⁰⁹ Mutindu kubeluka ya Kinzambi, kana mu kele na kieleka ve, mu ke tuba kima mosi ve samu na yawu. Kana mu kele na kieleka ve ti yayi kele Nkwizulu ya Mfumu, mu ke tuba kima mosi ve samu na yawu. Mu fwana vwanda na kieleka.

¹¹⁰ Mu vutukaka dyaka na dibulu. Muntu nyonso na bayintu ya bawu ya kukulumusa.

¹¹¹ Mpe mbokolo na autel, bantu mingi tentikaka maboko ya bawu na nela, ke kwiza na Klisto. Mpe bawu vwandaka yimba. Ntangu mu kumaka na yisi awa, mu tubaka, “Mfumu, ya lenda vwanda ve. Bantu yayi vwandaka yimba *awa* vwandaka kaka bantu mutindu bantu nyonso, kasi yayi *awa* vwandaka wakana mutindu ya vwandaka mwa . . . Ya lendaka vwanda mafunda zole to tatu ke yimba, *awa*, kasi ya vwandaka mutindu ti ya zolaka vwanda na nkama ya mafunda na zulu *kuna*.” Mpe ya vwandaka mosi ya bandinga ya lembami, ya soprano ya zulu mingi, mutindu bandinga ya bakento. Mu kuwaka, mpe kutekita lutaka kaka nzutu ya munu nyonso.

¹¹² Mu vutukaka dyaka mwa ntangu fyoti. Mu kuwaka. Mu belamaka, na zulu. Mu vutukaka, samu ti bawu vwandaka landila kaka na kuyimba na Kimpeve. Mu kuwaka dyaka. Ya vwandaka ndinga *yayi* ve. Mu lendaka kuwa bawu na yisi *awa*, mutindu yankaka ya ndinga; mpe yayi na zulu *awa*, mutindu yankaka ya ndinga.

¹¹³ Na yina ntangu lukutakanu manisaka, mu tubaka na pasteur, “Pasteur, mu kuwaka kima mosi ya ngitukulu.”

Yandi tubaka, “Yinki ya vwandaka, Mpangi Branham?”

114 Mu tubaka, “Mu kuwaka bandinga ya soprano ya bakento, ya bandinga yina me longukaka mingi, ya kulutila kitoko yina mu me kuwaka ntete ve na luzingu ya munu, *kuna* na zulu.”

115 Yandi tubaka, “Ya me kuwakanaka bambala mingi awa, Mpangi Branham.”

116 Mu tangaka na mama ya kiboba. . . Oh, mu me zimvana nkumbu ya yandi ntangu yayi, yina vwanda sambilaka samu na bambevo. Mpe nkokila mosi na manima pasteur kangaka dilongi ya yandi, mwa mama yina kwendaka kuna samu na kusambila samu na bambevo. Yandi vwandaka na bana tanu to sambanu ya fyoti pene-pene, na yandi. Mpe yandi telemaka mpe yandi kuwaka. Mpe ya kele Mama Woodworth-Etter, kana beno nyonso me tangaka ntete buku ya yandi. Mpe yandi kuwaka, yandi tubaka, “Chorale mosi vwandaka yimbila na zulu ya kuyimbila na yinzo-Nzambi.”

Na manima bandinga me bika, na yisi *awa*, Yawu ke landila kaka, beno me mona. Mpe mu telemaka kuna.

117 Mpe kaka kuna, kuna na manima ya kivinga. . . Beno ke mona mutindu ya kele ya kusungama, ya kulunga? Ntangu yayi, mu—mu ke kwikilaka na kuzonza na bandinga. Mu ke kwikila ti ya kele dikabu ya Nzambi, yina kele na kati ya dibuundu. Mu ke kwikila ti ba me sadila yawu yimbi mutindu Masonukwa yankaka ba me sadila yimbi, kasi ya kele na mosi ya kieleka. Yinga. Mpe muntu yayi telamaka na manima ya kivinga, kuna na manima, mpe tubaka na kutala bampova yiya to tanu na nzonzolo yankaka. Ve—ve kaka. . . Ya vwandaka ndinga. Beno lendaka kuwa. Muntu nyonso vwandaka swi.

118 Mpe Kima mosi tambulaka na zulu ya munu, mu me kuzwaka ata fyoti ve lutendulu, na luzingu ya munu. Mpe mu sadilaka yawu ve kuna, samu ti mu vwandaka na boma. Bima yango kele ya Nzambi. Beno ke sala mbote na kusakana ve na yawu.

119 Mpe Kima mosi tubaka na munu, “Pasteur ke sambila kisambu ya lukwikilu.” Mu zolaka kanga yinwa ya munu. Mpe mu vingilaka. Mpe awa Yawu me kwiza dyaka, kitembo mosi kwizaka, mpe tubaka, “Pasteur ke sambila kisambu ya lukwikilu.”

120 Mu banzaka, “Mfumu, mu ke na makabu ya ntendulu ve. Ya munu kele kusambila samu na bambevo, na yawu mu ke na makabu ya ntendulu ve.” Mpe mu kangaka yinwa ya munu mpe mu telemaka swi.

121 Mpe kaka kuna pasteur telamaka mpe bandaka na kusambila samu na bambevo. Oh, Yandi kele Nzambi! Bimbevo kubelukaka, bisika nyonso na kivinga, bisika nyonso. Yinki ya kele? Kubukana ya kilumbu. Ya kele dyaka na mwa divala yina me bikana. Beno vwanda na boma ve. Nzambi ke vwandaka ata mbala mosi ve kukondwa mhangi.

¹²² Mu ke tula kivuvu ntangu yayi ti kima mosi ya misitiki, kisika mosi, ya lendaka vwanda na ndinga ya Bawanzio ve, kasi kima ke bika konso musumuki, kana ya kele na mutindu na kivinga yayi, na kuzaba ti mpimpa ke na kukumaka mpimpa mpe mpimpa mingi na zulu ya ntoto, mpe mpimpa ya nene. Kasi Nkwizulu ya Mfumu me belama, ya kele yina ke sala yawu. Mpe mutindu sintidi ya beno, mu ke tuba, “Suka ke na kwiza.” Beno kubama, bambwetete ya suka, ke lezima!

¹²³ Bantu yikwa ke zola ti ba bambuka bawu na kisambu ya nsuka ntete beto kwenda? Beno telemisa kaka diboko ya beno.

¹²⁴ Nzambi ya luzolo, Nge ke mona bantu mutindu bawu ke telemisa maboko ya bawu. Mpe bawu kele ya kusungama na yayi. Mingi ya bayina sosaka na bazulunale, bawu sosaka na ba-philosophe, na babuku mpe mikanda ya bima ya kuswaswana, kasi dyaka bawu lendaka ve kuzwa mvutu. Kasi awa ya me kwiza, na suka yayi, na kati ya Biblia. “Suka ke na kwiza, mpe mpimpa ke na kwiza mpe.” Mpe beto ke sambila, Nzambi, ti Nge ke sakumuna muntu nyonso awa, yina me telemisa maboko ya bawu. Mpe Nge zaba yina kele na manima ya diboko yina me telema. Mpe, Mfumu, mu ke kwikila ti kaka kisika bawu kele ya kuvwanda ntangu yayi, ti yina kele bisika nyonso Nzambi kele na kiyeka ya kukabula na bawu difwa ya Mpeve yina ba ke na kusosaka na ngunga yayi. Pesa na mosi na mosi, Mfumu. Samu na mbote ya Ndinga ya Nge mpe nsatu ya bawu, mpe nsilulu ya Nge ya Kinzambi yina lenda kubwa ve, bika ti bawu kuzwa yina bawu me telemisa maboko ya bawu, na yina mu ke pesa kisambu yayi samu na bawu. Na Nkumbu ya Mfumu Yesu, ti bawu kuzwa yawu. Amen.

Nzambi vwanda na beno.

¹²⁵ Ntangu yayi beto kele kaka na ntangu fyoti samu na . . . Ntangu yayi beto ke sambila samu na bambevo. Mu kele na kyese mingi na kuzaba ti ya kele na kivuvu samu na bambevo. “Mu kele Mfumu Yina ke lemvo kila disumu ya nge nyonso ya nku, Yina ke belusa bimbevo ya nge nyonso.”

¹²⁶ Mpe munu, kaka na mutindu ya ngitukulu mutindu ya kele, mu vwandaka me kwenda ntama mingi ve, na ntwenya ya mama na zulu ya civière yayi. Mpe yandi kele yina me kubwa na kimbevo ya Hodgkin. Mpe mu banza ti ya kele mama ya yandi ya kuvwanda awa na yandi. Mu ke ndima yawu. Yinga, ya kele kieleka, ti mama yayi vwandaka tuba na munu samu na mwana ya yandi, mpe mu vwandaka meka na kupesa yandi kikesa.

¹²⁷ Mpe kaka mbokolo, mpe, na manima ya nsangu yayi. Mu ke kuwa ti mpulusu kele kima ya ntete. Kubeluka kele ya zole. Kubeluka lendaka vwanda tii nsuka ya luzingu ya beno, bamvula mingi. Ya lendaka pesa beno kilengi mpe kyese na yina beno kele awa na zulu ya ntoto, kasi ya ke suka na ya beno . . . na lufwa ya beno. Kasi moyo yina me kuzwa mpulusu, kele na Luzingu

ya Kukonda nsuka. Ya lenda kufwa ve, to kima mosi ve lenda katula yawu na beno. Ya me kota na Babuku ya Nzambi, samu na kuvumbuka na bilumbu ya nsuka. Kima ya nene kele kima ya ntete, “Ntete, Kimfumu ya Nzambi mpe ludedomo ya Yandi, bima yankaka ke bwelama.”

¹²⁸ Mu ke zola kaka kupesa kimbangi mosi ya kubeluka ya kimbevo yayi ya boma yina kento yayi ya ntwenya ke na kutala mpasi. Mpe ya vwandaka na mwa ntangu me luta . . . Ba lendaka vwanda awa na suka yayi. Mu kele awa ntangu nyonso ve samu na kuzaba nani kele nani. Mingi ya beno mu zaba ve. Kasi ya vwandaka na ntwenya mosi ya kento awa na lukolo ya beto ya bambuta. Mpe yandi vwandaka bela na kimbevo yayi ya Hodgkin, mpe ba nataka yandi na dokotolo, samu kuvimba yayi ya nene vwandaka basika yandi. Mpe ba bakaka kitini ya kuvimba yango mpe fidisaka yawu, samu na kutala yina ya vwandaka. Mpe ya vutukaka, “Kimbevo ya Hodgkin yina lenda beluka ve.”

¹²⁹ Mpe mama vwandaka zola ve mwana kuzaba yina vwandaka mpasi ya yandi. Mpe badokotolo longaka mama na kubika kaka yandi kukwenda na lukolo, samu ti yandi vwandaka kaka na bilumbu mingi ya kuzinga. Na nsuka ya mwanganaka na ntima. Mpe kimbevo ya Hodgkin kele cancer, beto zaba yawu, na mutindu ya mutindu ya yawu. Na yina ba vutulaka mwana-kento ya ntwenya na lukolo, samu na kubika yandi kufwa.

¹³⁰ Mama yango vwandaka na kidi-kidi. Mpe yandi bokilaka munu na alo-alo, mpe yandi tubaka, “Mu zola nata yandi. Kasi mu me bakula, Mpangi Branham, ti na bandonga ya bisambu ya nge, ntangu mingi, nge ke bokilaka bimbevo ntangu nge kele na kati ya lutwadusu ya Mpeve.” Yandi tubaka, “Nge lenda vwanda mbote mingi, kana Mpeve-Santu monisa kima mosi na yina me tala mwana, na kutuba yawu ve?”

¹³¹ “Mbote,” mu tubaka, “Mu banza ve ti Yandi ke monisa yawu, kana Yandi zola ve ti yawu kuzabana.” Mu tubaka, “Na mpasi mu ke banza mutindu yina. Mpe na tabernacle ya munu mosi awa, na mpasi mu ke simbisa balukutakanu ya mutindu yina.” Mu tubaka, “Mu ke sambila kaka samu na bambevo.”

¹³² Mpe mama yayi ya ntwenya kwizaka na ndonga. Mpe mu yufulaka mama yango, “Nge kele Muklisto?”

Yandi tubaka, “Ve.”

Mu tubaka, “Mwana-kento kele Muklisto?”

“Ve.”

¹³³ Mu tubaka, “Ya kele na mutindu ya mpasi na kubasika na yinza.” Mpe mu tubaka, “Nge ke mona dyaka yandi ve, kana yandi kota mutindu yina.”

¹³⁴ Na yina ntangu mama yayi ya ntwenya kwizaka na kivinga na suka yina . . . Mpe lutaka kaka na kisika mosi yayi kisika

ba sambilaka mwana-kento ya ntwenya; mutindu mosi mwana-kento yayi ke vwanda, na mwa minuti fyoti. Mu yufulaka yandi. Mu zabaka yandi. Mpe mu tubaka, “Nge kele mama ya ntwenya ya lukolo ya bambuta awa?”

Yandi tubaka, “Mu kele.”

Mu tubaka, “Nge zaba kimbevo ya nge?”

¹³⁵ Yandi tubaka, “Badokotolo tubaka na munu ti bawu ke banza ti mu ke vwanda mbote mingi.”

¹³⁶ “Mbote,” mu tubaka, “yinki ke salama kana nge kuma mbote ve? Nge kele Muklisto?”

Yandi tubaka, “Ve, tata. Mu kele ve.”

Mu tubaka, “Nge zola kuvwanda Muklisto?”

Yandi tubaka, “Mu zola.”

¹³⁷ Mpe mu tubaka, “Nge lenda pesa ntima ya nge na Klisto?” Mpe yandi tubaka ti yandi ke sala yawu. Mpe mama ya yandi kimaka mbangu mpe tubaka ti yandi ke sala mpe mutindu yina. Na yina, mu botikaka bawu zole awa na kiziba ya maza. Mu sambilaka samu na mwana-kento ya ntwenya.

¹³⁸ Mpe ntangu landilaka na kukwenda. Mpe na nsuka mwana-kento bandaka na kukuma mbote, na manima ya mwa bilumbu fyoti, yandi zabaka ve yina vwandaka tambula mbote ve. Mpe na manima ya mwa ntangu fyoti, ba vutulaka yandi samu na kizame, mpe ba lendaka mona ata kidimbu ya yawu ve, ata fyoti ve. Ya kele. . .

¹³⁹ Mu ke zolaka ve kutuba na kuvimbisaka bima yina me tadila bantu, kasi mu ke zolaka kuvwanda ya kusungama na yina me tala bantu. Ya kele na muntu na kati ya mbanza yayi, yina kele mbote ya kuzabana, mpe mpangi-bakala ya Muklisto ya mbote, to yandi zolaka vwanda ve diakre ya dibuundu yayi. . . Mu zola tuba, administrateur ya dibuundu. Mpe yandi kele awa ntangu yayi. Mpe yandi bakaka kaka yawu na zulu ya yandi mosi samu na kukeba mwana-kento yina. Ya vwandaka bamvula na ntwala, bamvula zole to tatu na ntwala, mama yayi ya ntwenya manisaka lukolo ya yandi mpe vwandaka basika na mwana-bakala mosi.

¹⁴⁰ Mpe mu kutanaka na yandi na bala-bala kilumbu mosi, mpe yandi vwandaka na kyese mingi, mpe pesaka kimbangi na nkembo mpe ngolo ya Yesu Klisto, na manima ba tubaka na yandi yina ya vwandaka. Mwana-kento me kwelana. Yandi kele na bana. Mpe yandi ke na kuzinga na kyese.

¹⁴¹ Mpe tata ya yandi ke kwizaka na kisika ya mumbungu ya muntu yayi, samu na kuzenga nsuki ya yandi. Mpe Tata Egan awa, yandi vwanda—vwanda landila dyambu yango ntangu nyonso. Mpe mwana-kento kele na mavimpi ya mbote mpe kele mbote. Mpe ya vwandaka bilumbu yikwa, Mpangi Egan? Bamvula mingi me luta, mutindu yina ve? [Mpangi Egan me

tuba, “Bamvula yiya, tanu, sambanu me luta.”—Mu.] Mpe yandi ke na kuzinga bubu yayi, samu na kimbangi ti Nzambi ke belusaka kimbevo ya Hodgkin.

¹⁴² Oh, ya kele mbote mingi na kuzaba, ti na bangunga ya mawa, ti beto kele na kiswamunu. Kiswamunu yango kele Klisto.

¹⁴³ Mu zola kaka kusamuna samu. . . na bayankaka ya beno, mwa kima na lukutakanu, yina vwandaka me salama kaka. Mfumu vwandaka mbote mingi na kupesaka mvutu na bisambu ya beno ya nyonso, na yina mu kwendaka na Wesete samu na lukutakanu na ntangu yayi, basabala fyoti me luta, basabala zole. Mpe na yina beto vwandaka na Tulsa, na lukutakanu, mu zolaka. . . mu zolaka zonza ve, samu. . . mu zolaka kuzwa lukutakanu kuna. Kasi milongi vwandaka na ba-reveil yankaka yina vwandaka salama, na yina mu lendaka vwanda ve na lukutakanu na ntangu yina. Kasi mu lutaka, samu na kubaka Mpangi Arganbright, samu na kunata yandi na Californie; kento ya munu mpe munu, mpe Joseph ya fyoti.

¹⁴⁴ Mpe na nkokila yina, ntangu beto kumaka na nsukinina, mu bakulaka ti Oral Roberts mpe Tommy Osborn vwandaka longa na nkokila yina. Na yina Mpangi Arganbright bokilaka na ba-hotel tii yandi bakulaka kisika beto vwandaka, mpe yandi tubaka, “Kwiza na lukutakanu.” Na yina yandi kwizaka, yandi mpe Mpangi Sonmore, Bantu ya Mumbungu ya Miklisto, mfumu ya kapu ya Minneapolis. Ba—ba kwizaka baka munu.

¹⁴⁵ Mpe mu kotaka, mpe bawu vwanda kudya yimeni, na kati—na kati ya kivinga ya balle ya Mayo, kisika ya nene. Bantu bamafuku ya mbongo mingi vwandaka ya kuvwanda kuna. Mpe na yina beno zaba mutindu mu ke kuwaka na kukota na kisika mutindu yina. Mu zabaka kaka ve mutindu ya kusadila bambele mpe bansomo yina bawu vwandaka na yawu na mesa. Kasi mu kotaka.

¹⁴⁶ Mpe na yina mu kotaka, Oral Roberts vwandaka longa. Mpe yandi vwandaka longa na kuvwandaka na bima mingi na luzingu, kuvwanda na bima mingi, mpe vwandaka tuba na Bantu ya Mumbungu ya Miklisto, ti, “Yesu kangaka bambisi, tulaka bawu na ba-filet, mpe vwandaka na ya kulutila na yina bawu lendaka—bawu lendaka sadila.” Mpe Mpangi Roberts kele muntu ke zonzaka na ngolo, mutindu beno zaba. Mpe yandi tubaka, “Ya kele na bantu mingi.” Mpe yandi tubaka, “Ntangu yayi, mu ke na kutungaka tempelo awa, mu banza ya ba-million ya ba-dollars.” Yandi tubaka, “Ya kele ya kutunga na marbre ya mpembe.” Mpe yandi tubaka, “Mu kumaka na yawu na kutala na kati-kati, mpe mu vwandaka kondwa mbongo.” Mpe yandi tubaka, “Na yina mu sabukaka bala-bala kilumbu mosi, samu na kutala yawu, mpe dyabulu tubaka, ‘Nge zaba yinki? Bantu ke luta mpe ke tuba, “Ya kele yina Oral Roberts salaka.”’”

¹⁴⁷ Yandi tubaka, “Na yina mu tubaka na dyabulu, ‘Kasi ba fwana tuba, “Oral Roberts mekaka.”” Ya kele mbote. Mpe yandi tubaka, “Na yina ya tulamaka na zulu ya ntima ya muntu mosi ya banki, awa na kati ya mbanza, yina defisaka munu ya kulutila, na kutala, ba-million zole ya ba-dollar na banki, samu na kumanisa yinzo yango ya nene.” Babanki ke salaka yawu ve. Beno zaba yawu.

¹⁴⁸ Mpe yandi tubaka, “Muntu ya mumbungu yina, muntu ya banki yina, kele ya kuvwanda awa ntangu yayi.” Yandi tubaka, “Mu zola ve kutanguna nkumbu ya yandi, samu ti yandi kele ve kieleka ya bantu ya Nsangu ya mbote ya muvimba. Kasi,” yandi tubaka, “yandi kele awa.” Mpe yandi tubaka, “Mu—mu banza ve ti yandi ke tubaka ti yandi kele Muklisto. Kasi,” yandi tubaka, “kima mosi ningisaka ntima ya yandi, mpe yandi bikaka munu kuzwa mbongo.” Yandi tubaka, “Kana yandi zola kutelema,” yandi tubaka, “yandi lenda, kasi mu zola ve kunyongisa muntu yango.”

¹⁴⁹ Bakala yango telemaka, yandi tubaka, “Mu ke na nsoni ve, Tata Roberts,” mpe vwandaka.

¹⁵⁰ Na yina mu kotaka, mpe mu vwandaka vwanda. Na manima Mpangi Roberts, kaka na ntangu yandi manisaka, yandi kwizaka mpe pesaka munu mbote, mpe yandi bendaka munu na maboko ya yandi. Mpe kaka baminuti fyoti, kuna, kieleka, bantu mingi me kwiza, beno zaba, na kuzonzaka na yina beto vwanda kudya dyaka, mpe ke sosa balukutakanu mpe nyonso yina, mpe balongi.

¹⁵¹ Mpe na yina Demos Shakarian telemaka. Yandi kele ntwadisi ya kapu ya Bantu ya Mumbungu ya Nsangu ya mbote ya Muvimba. Mpe yandi telamaka mpe yandi tubaka, “Beno zaba, mu me twadisama kaka ti Mpangi Branham kulonga samu na beto, na nkokila yayi, nsangu ya nsuka.”

¹⁵² Mbote, mu zabaka ve yinki ya kutuba. Mpe yandi bandaka na kutuba na bantu yina vwandaka ya kuvwanda awa, yandi tubaka, “Yayi kele *Kingandi*. Mu kutanaka na yandi bubu yayi.” Ba vwandaka tuba na muntu ti bawu vwandaka bantu ya kuzwa babloke tatu to yiya ya muvimba ya Mile Miracle yayi. Bantu ya bamafuku ya mbongo mingi mpe basansi-bibulu, mpe nyonso yankaka yina, mpe yinki mu lendaka tuba na lukutakanu mutindu yina?

¹⁵³ Kasi, beno zaba, ya ke vwandaka ntangu nyonso mbote na kutumama. Na yina mu telamaka samu na kuzonza ya kulutila mbote yina mu lendaka sala. Mpe na nsuka ya lukutakanu. . . Ya kele nyonso na ngaanda ya nzila samu na kupesa mbokolo na autel na kisika mutindu yina. Kasi, beno zaba, mu me salaka bambokolo na autel na balukutakanu ya mafwa. Na yawu mu banzaka, “Awa kele siansi ya mbote.” Mpe mu—mu salaka mbokolo na autel. Mpe babakala yina nyonso ya bimvwama mpe

bakento kwizaka na Mfumu Yesu, mpe pesaka bantima ya bawu na Mfumu.

¹⁵⁴ Mu yitukaka na kumona kento ya millionaire mosi, ya multimillionaire ya kulwata mwa yimpu mosi, na mwa mansala ya kubongisa na ziunga na lweka, yina lendaka vwanda ya sumbaka nkama ya ba-dollar. Mpe masa ya meso vwandaka kulumuka na matama ya yandi. Yandi simbaka munu na diboko, yandi tubaka, “Mpangi Branham, ntima ya munu me ningana.” Yandi tubaka, “Mu banzaka ti mu vwandaka Muklisto, tii ntangu yayi.” Yandi tubaka, “Mu zola kusadila Mfumu.”

Mpe mu tubaka, “Matondo.”

¹⁵⁵ Mpe na yina na mwa ntangu fyoti, Kima mosi tubaka na munu, “Sambila samu na bambevo ntangu yayi.”

¹⁵⁶ Mu banzaka, “Oh, ve. Mu lenda sala yawu ve. Mu me zenga yimeni . . . kivinga yayi ya nene ya ballroom. Na yawu kana mu sambila samu na bambevo, bawu ke banza ti mu kele kieleka fanatiki.” Na yina mu banzaka, “Ya kieleka Mfumu lendaka tuba na munu yawu ve. Ya lendaka vwanda mu kele mingi na kyese samu na balukutakanu yayi, na yawu me ke syelumuka mpe ke vwanda.”

¹⁵⁷ Mpe mu kwendaka na mesa ya bantu ke zonza, kieleka na nsuka, mpe vwandaka na Mpangi Jack Moore, mu vwandaka ya kuvwanda kuna, vwandaka zonza. Mpe mu vutulaka lukutakanu na ntwadisi, Tata Shakarian.

¹⁵⁸ Na yina ntangu yandi—yandi telamaka, mpe yandi tubaka, “Nge zaba yinki?” Oh, Nzambi zolaka simba yandi na dipeka. Yandi tubaka, “Mu me kuwa mutindu ti Mpangi Branham kuvutuka mpe kusambila samu na bambevo.”

Mu banzaka, “Oh, kaka kieleka.”

¹⁵⁹ Mpe mu telamaka mpe tubaka na bawu. Mpe mu tubaka, “Mu kuwaka yawu. Mpe mu ke sambila Nzambi na kulemvokila munu. Kasi ya kele mbote ntangu muntu yankaka me simbama, mpe, beno zaba, kusala beto nyonso na kuzabaka ti ya kele kisalu ya Mpeve.”

¹⁶⁰ Na yawu mu tubaka, “Ntangu yayi, kubeluka ya Kinzambi ke simba ve dikunzi ya kutenga-tenga. Ya ke kaka kima yina ba ke banzaka ve. Ya kele Nzambi mosi yina vulusaka bantu nyonso yayi awa ntama mingi ve. Yandi kele Nzambi mosi yina ke belusaka bantu nyonso yina kele awa, kaka na lukwikilu ya pete-pete yina ke kwikilaka Yandi.” Mu tubaka, “Beno ke kwikila yawu?”

¹⁶¹ Mpe ntangu yayi na kinsweki, na dibuundu ya munu. Mutindu beno zaba, ministele ya munu ke na kusobaka, mpe, oh, wapi nsobolo ya nkembo! Oh! Beno nyonso ke bambuka moyo na Bandinga yina ba vwandaka bula. Mpe ntangu nyonso ya ke salamaka, kima mosi ke salamaka, ntangu mu ke kota

na kuzonza na zulu ya yawu, kwiza—kwiza na munu, “Tuba na mongo yayi.” Samu na yinki ya vwandaka? Ya vwandaka lukwikilu. Kima nyonso keke na nzila ya lukwikilu. Lukwikilu keke ve kima yina beno ke salaka. Lukwikilu keke kima yina keke na beno.

¹⁶² Mpe mu banzaka, “Kana . . . Mu ke vwandaka ntangu nyonso na nsoni ya lukwikilu ya munu, na bantu, mutindu mbote Mfumu me vwandaka.”

¹⁶³ Yandi lakisaka bima, tubaka ba-vision. Bima nyonso vwandaka ya kulunga. Beno bantu zaba yawu. Ya keke muntu ve. Ya keke ve muntu. Ya keke Nzambi yina ke salaka yawu.

Mpe foto yayi *awa*, mutindu ya kwendaka na yinza!

Bayina bakamaka na Allemagne!

¹⁶⁴ Mpe awa basabala fyoti me luta, mu banza ti banzenza awa me monaka yawu ata fyoti ve, bawu simbaka mosi na yankaka. Mu keke na yawu na yinzo. Ya keke foto ya Mfumu Yesu ya kutelama kaka na manima kisika mu vwandaka ya kutelama. Mpe maboko ya Yandi keke na ngaanda, mpe baludimi ya Tiya keke na kupepa na diboko ya Yandi, na yina mu vwandaka zonza na zulu ya dilongi, “Tuba na mongo yayi, ‘Katuka awa,’ mpe beno tula ntembe ve na kati ya ntima ya beno, kasi beno kwikila.” Mpe beto kuzwaka yawu. Ya keke na Techni- . . . batinta ya Kodachrome. Mpe ba keke na yawu na yinzo ntangu yayi. Mpe ba keke na kusalaka. . . Ba me fyongonina yawu ntangu yayi na nzila ya science, mpe nyonso yankaka yina, mpe ba-laboratoire. Ya keke basika ntama mingi ve, mosi yankaka, yina keke sala pene ya sambanu ya yawu ntangu yayi na bisika yankaka, yina ba bakaka.

¹⁶⁵ Yayi keke ya kulutila na nyonso ya yawu, yina me monanaka ntete ve. Kuna keke mandefo ya Yandi—ya Yandi, kizizi ya Yandi, profile ya Yandi, maboko ya Yandi ya kufunguka. Mpe mu vwandaka ya kutelama kaka mutindu *yayi*, mpe kisika Yandi keke na maboko ya Yandi, beno lenda mona ve kisika ya munu, mutindu yina; yintu ya munu, mpe makulu ya munu na yisi na ntoto, kaka yintu mpe makulu, kaka yina bikanaka. Beno me mona? Mpe Yandi—mpe Yandi me telega na maboko ya Yandi mutindu *yayi*. Mpe mu basisaka maboko ya munu mutindu *yayi*, na kulongaka, na kutubaka, “Tuba na mongo yayi.” Mpe kaka na ntangu yina, kima mosi salamaka. [Mpangi Branham me fina misapi ya yandi—Mu.] Mpe bawu kangaka foto ya Yawu mutindu yina. Mpe kuna Yawu vwandaka, na manima, na bantinta nyonso. Mpe ya nene, mutindu Nzambi ke salaka, kitunga ya nene ya lis calla ya kuvwanda pene-pene.

¹⁶⁶ Yandi keke Lis ya Vallée. Mpe wapi kisika beno keke kuzwaka ba-opium? Ya keke katukaka na ba-lis. Ya keke kieleka. Yinki Opium ya Nzambi keke? Ngemba. Opium ke salaka kaka beno kuzimbana nyonso yina me tala poto-poto ya beno. Banwi-

makaya opium, ya kele mutindu bawu ke kufwaka bawu mosi na opium yina. Nzambi kele na Opium. Amen. Yandi ke belusaka konso mpasi, ke belusaka bimbevo nyonso, ke katulaka boma nyonso. Ntangu nyonso yina beto ke na kupemaka na Opium ya Yandi, beto kele na ngemba.

¹⁶⁷ Mpe kitunga ya nene ya ba-lis kele ya kuvwanda kaka na ntuala, kisika mu vwandaka zonza, na estrade.

¹⁶⁸ Mpe mu sambilaka samu na bambevo, kuna na Tulsa, mpe mu kwendaka kaka mpe basikaka. Mpe pene ya baminuti kumi na manima . . .

¹⁶⁹ Mu ke zola ve kutanguna nkumbu ya évangéliste. Kasi kento mosi yina vwandaka na arthrite na mukongo, yina vwanda salaka samu na evangeliste yayi, kento yango vwandaka stenographe. Mpe yandi zolaka bula mutindu *yayi*, samu ti maboko ya yandi mpe mapeka ya yandi vwandaka ya kukangama. Yandi vwanda bulaka mutindu *yina*. Mpe evangeliste yayi—yayi ya nene mpe ya kuzabana kuna na Tulsa, bakaka yandi na kisalu ya yandi, samu na kupesa yandi kisalu.

¹⁷⁰ Mpe yandi bandaka na kutambula na kulwale. Mpe na mbala mosi maboko ya yandi fungukaka, mpe yandi bandaka na kudumuka mpe kuboka, tii kuna yandi bendaka bukebi ya bantu nyonso kuna. Mpe kento yina ya luzolo kubwaka na makulu ya yandi, mpe kutelemisaka maboko ya yandi mpe vwanda bula yawu mutindu *yayi*. [Mpangi Branham me bula maboko ya yandi—Mu.] Nkembo ya Nzambi, samu ti Nzambi pesaka yandi kimpwanza, kaka mwa ntangu fyoti na manima ya kisambu.

¹⁷¹ Mpe mu kotaka na malembe, samu na kuwa mpe kumona yina yandi vwandaka tuba. Yandi tubaka, “Mu vwandaka tambula kaka na kulwale.”

Mpe mu tubaka, “Mbote, matondo na Nzambi.”

¹⁷² Mpe mu balukaka, mu bandaka na kutambula na lweka yankaka. Mpe mu kuwaka, kuna, mu monaka misumuki nyonso kutambula kintwadi, samu na kumona yinki vwandaka dyambu. Mpe awa vwandaka na muntu bakaka ndinga, Mpangi Gardner, mpangi mosi yina pesaka munu kazaka yayi.

¹⁷³ Mingi ya beno zaba Mpangi Gardner. Mpangi Gardner, na Binghamton, na New York, mutungi ya mutindu yankaka ya Oldsmobile ya bamvula tatu yina me luta, yina tekaka matoma mingi ya Oldsmobile kulutila muntu nyonso yankaka na Etats-Unis. Mpe yandi ke pumbukaka na mpepo ya yandi mosi. Mpe mwa mvula mosi me luta . . . Nkumbu ya yandi kele George Gardner. Mpe yandi . . .

¹⁷⁴ Kinati-mpepo ya yandi, na nzila ya yandi mosi, vwandaka solo, mpe kubwaka mpe, mpepo, mpe pasulaka makulu ya yandi, mabulu ya yandi. Mpe makulu ya yandi vwandaka

ya kukangama, mpe yandi vwanda tambulaka mutindu *yayi*, kinati-mpepo ya yandi.

¹⁷⁵ Mpe yandi vwandaka kuna ntangu ba salaka kisambu, mpe yandi kwendaka yandi mosi na kulwale kisika mukembo ya nene vwandaka. Mpe ba kuzwaka samu na yandi kivinga mosi pene-pene, mpe, samu yandi kuzwa ve mpasi na kukwenda mpe kuvutuka. Mpe awa vwandaka kimbangi ya yandi. Yandi kwendaka na kivinga ya yandi mpe vwandaka; yandi vwandaka mpe ve Muklisto. Mpe yandi tubaka, “Na mutindu nyonso yankaka, mu ke kwikila ti mwa muntu ya dibandi yina longaka kuna na nkokila yayi.” Mpe yandi tubaka ti yandi bandaka na kutala misapi ya yandi bandaka na kuningana. Mpe yandi dumukaka na makulu ya yandi, na mavimpi ya mbote.

¹⁷⁶ Ya kutelama kuna, ke kembila Nzambi, ya kutelama, ke telemisa makulu ya yandi na zulu mpe na yisi mutindu *yina*, mpe na balweka ya makulu ya yandi mpe nyonso, ke pesa kaka kimbangi na nkembo ya Nzambi.

¹⁷⁷ Mbala mosi dyaka, na ntwala beto sambila samu na bambevo. Mu vwanda vwanda na Mpangi Arganbright. Mpe bankundi ya munu ya mbote, Leo mpe Gene, zaba yina alo-alo kele. Ntangu alo-alo vwanda bula, mpe Mpangi Arganbright ke pesa mvutu. Mpe, beno zaba, beno lenda vwanda bisika nyonso ve. Kasi, ya salamaka ti, mu bakaka alo-alo.

¹⁷⁸ Mu ke kwikila ti bima nyonso ke tambula na nzila ya muswa ya Nzambi. Beno ke kwikila ve? Mu ke kwikila ti ya kele samu na yina ntwenya ya mama kele awa. Mu ke kwikila ti ya kele samu na yina beno nyonso kele awa. Mu ke kwikila ti ya kele samu na yina mu kele awa, ti beto me kutana kintwadi samu na nkembo ya Nzambi, samu na kikuma mosi. Samu na yinki beto me kwiza na bisika ya galasi, samu na kuvwanda awa na suka yayi?

¹⁷⁹ Na yina mu bakaka alo-alo, samu Mpangi Arganbright vwandaka ve na yinzo. Mpe ya tubaka, “Mu ke zola kutuba na Mpangi Branham.”

Mu tubaka, “Mu kele Mpangi Branham.”

¹⁸⁰ Yandi vwandaka muntu ya Espagne. Yandi tubaka, “Tata, mu zaba ti ya kele mbote ve, na kutala, samu na munu na kuyufula kyuvu yina mu ke yufula.” Yandi tubaka, “Mu lenda banza mutindu bantu ke benda, mpe nyonso yina. Kasi,” yandi tubaka, “Mu kele missionnaire na Mexique.” Mpe yandi tubaka, “Na kuvutuka awa, mu ke zinga awa na La Crescenta. Mpe mu me longoka, bangunga fyoti me luta, ti beno vwandaka na mbanza.” Mpe yandi tubaka, “Mu vutulaka bébé ya munu, samu na kumeka kunata yandi na nge to Mpangi Roberts, to mosi ya bampangi yina ke sambilaka samu na bambevo.” Mpe yandi tubaka, “Na kuvwandaka bébé ya munu, lukwikilu ya munu, mu banza, me vwanda kaka mwa ya kulemba.” Yandi tubaka, “Bébé

ya munu kele ntete ve na bangonda yiya mpe yandi ke na kufwa na cancer.”

Mpe Kima mosi tubaka na munu, “Kwenda na bébé yina.”

¹⁸¹ “Mbote,” mu tubaka, “tata, mu ke kuzwa Mpangi Arganbright, mpe nge ke tuba na yandi kisika bébé kele, mu ke kutana na nge.” Na yina yandi me baka. . . Mu bakaka Mpangi Arganbright, mpe yandi tubaka na yandi.

¹⁸² Na yina beto kotaka na ditoma mpe kwendaka. Mpe mu kutanaka na mwa kento ya yandi. Mpe yandi na kuvwandaka muntu ya Mexique, ata ti yandi talanaka yawu ve. Yandi vwandaka na mpusu ya mpembe, ya kitoko, kasi yandi vwandaka muntu ya Mexique. Na kutala, bantu ya Mexique, bambala mingi, kele mwa mpembe, samu ti ba ke kwizaka na kati-kati ya bantu ya Espagne mpe bantu ya Inde. Mpe ya kele na bayankaka ya ba-Indien yina kele kaka mpembe, mutindu mvula ya mpembe. Mpe kuna kento ya yandi vwandaka muntu ya Finlande, ya kieleka mpembe, mwa kento mosi ya mbote kieleka.

¹⁸³ Mpe mu kwendaka na lupitalu na yandi, samu na kumona bébé ya yandi. Ntangu mu kotaka na kivinga, ba tulaka yandi kaka pene-pene ya bilo ya nene ya bibuki ya kento. Samu ti, mwa bebe yina, kieleka kaka bangonda yiya, mpe yandi butamaka na kuvimba ya mayele na bambwanga, yina vwanda luta na kutala ntama *yina* tii na kizizi ya yandi, mutindu *yina*, kaka na ngaanda mutindu yina. Mpe badokotolo mekaka na kusala lipaso. Mpe bidimbu ya bamputa ya nene vwandaka ziunga ya mwa laka ya yandi, nzila nyonso na ziunga. Ya sukisaka yawu ve; yina salaka kaka ti ya mata tii na ludima. Mpe mwa bambwanga yina vwandaka ya kulelika mutindu *yina*, mpe bidimbu ya bamputa ya nene. Mpe wa ludima ya yandi. . . Mwa yinwa ya yandi vwandaka nene mutindu *yina* ve. Mpe ludima ya yandi, ya kuvimba, na kutala nene *yina*, basikaka pene ya ntama *yina*, mpe kumaka ndombe. Mpe ya kangaka kupema ya yandi ntangu kuvimba kumaka, ntangu ya mataka na zulu ya yinwa ya yandi. Mpe ya kieleka, ya zengaka kupema ya yandi, katuka *awa*. Ba zolaka zenga dibulu na laka ya yandi. Mpe yandi vwandaka na mwa lusibu ya fyoti. . . mutindu mwa tube ya kizengo na laka ya yandi. Mpe mwa maboko ya yandi vwandaka ya kukangama, mutindu *yayi*, samu ti yandi katula ve lusibu yina; ya zolaka kanga kupema. Mpe cancer, maza ya yawu vwanda kulumuka, mpe infirmière zolaka telama kuna na mwa kima samu na kukatula kukulumuka ya maza ya cancer na lusibu, to ya zolaka kanga kupema mpe kufwa.

¹⁸⁴ Mpe tata kwendaka pene-pene ya mbeto, mpe yandi tubaka, “Ricky, mwana-bakala ya fyoti ya papa!” Yandi tubaka, “Papa me nata Mpangi Branham na kusambila samu na nge, Ricky.”

¹⁸⁵ Ntangu yandi tubaka, “Mwana-bakala ya fyoti ya Papa,” mpeve ya munu bikaka kaka munu. Mu lendaka dyaka ve

kukanga ntima na yawu. Mu zolaka simba kaka na lweka ya mbeto. “Mwana-bakala ya fyoti ya Papa.” Mpe mwa bakala yayi, dyaka ntwenya mutindu yandi vwandaka, yandi zabaka ti ya vwandaka papa ya yandi. Mpe yandi bandaka na kusala makelele ya kulemba mutindu yina, mpe mwa maboko ya yandi mutindu yina. Mpe yandi vwandaka meka na kubula mwa mwana yango na zulu ya yintu. Mwa bébé ya mputu, yina butukaka mutindu yina. Mu lendaka tuba ve. Mu kaka. . . Beno zaba, beno ke kuma kaka ya kifuluka, beno lenda kaka ve kutuba kima mosi.

¹⁸⁶ Mu talaka na yisi, mu monaka mwa maboko yango ya fyoti na yisi ya bitezo yango ya nene. [Mpangi Branham ke sala makelele mingi—Mu.] Mpe ke sala makelele ya malembe. Mpe mu banzaka, “Ya kele ve kyadi!”

¹⁸⁷ Mpe na manima mu kumaka pene-pene ya munu mosi, mingi samu na kubanza kima mosi, Mu banzaka, “Yesu, Nge zola tuba ti Nge ke kuzwa kilengi na kumona yawu? Mu lenda kwikila yawu ve. Mu lenda kwikila kaka ve ti Nge ke kuzwa nkembo na bébé yina ya fyoti ke na mpasi mutindu yina. Ya lenda vwanda kaka ve. Kana ya ke sala munu, musumuki, kuwa mutindu mu ke sala na bébé yango, wapi mutindu ya ke sala na Nge, yinto ya mawa nyonso? Yinki ya fwana sala na Nge?” Mpe mu tubaka ntete bampova ve.

¹⁸⁸ Yandi zolaka meka na kusakana na yandi, samu yandi vwanda swi. Mpe mwa nzutu ya yandi na mwa couche mosi, kaka pene. . . Mwa nzutu yango, mpe nyonso yina, ya nene ya *yina* ve. Mpe yintu ya yandi vwandaka kisika ya kulutula nene, bambwanga ya yandi vwandaka vwandaka ya kuvimba mingi. Mpe ba vwandaka na kima mosi pene-pene ya yintu ya yandi, samu na kukanga mwa yintu ya yandi ya fyoti na kupanzana. Beno zaba, kinuka; bambwanga ya yandi vwandaka ya kuvimba mingi, na ngaanda mutindu *yina*, samu na kusimba yawu na kupanzana. Mpe infirmière vwandaka ya kutelama kuna.

¹⁸⁹ Mpe mu talaka mwana yango, mpe mu banzaka, “Mfumu, yinki Nge zolaka sala kana Nge vwandaka ya kutelama awa?”

¹⁹⁰ Ntangu yayi, mu me bakula ti mu kele na chaire. Mpe mu me bakula ti Nzambi kele awa. Kasi ya monanaka ti Kima mosi tubaka kuna na kati ya moyo ya munu, mpe tubaka, “Mu ke vingila na kumona yina nge ke sala samu na yawu. Mu pesaka lutumu ya Munu na Dibuundu.” Kuna beno ke vutuka dyaka, “Tuba na mongo yayi.” “Mu pesaka lutumu ya Munu na Dibuundu, mpe mu ke na kuingila na kumona yina nge ke sala.”

¹⁹¹ Mu ke kukiyufula kana ya kele nkadulu ya Yandi na ntuala ya beto ntangu nyonso, ti Yandi ke na kuingila na kumona yina beto ke sala. Wapi mutindu samu na bidimbu ya ntangu beto vwandaka longa? Yinki Yandi zolaka sala? Yandi ke na kuingila na kumona yina beto ke sala.

¹⁹² Mbote, mu bakaka mwa diboko ya mwa bebe ya yandi na ya munu, kaka na misapi ya munu, mutindu *yina*. Ya vwandaka fyoti mingi. Mpe mu tubaka, “Mfumu, kuwa kisambu ya kisadi ya Nge. Mpe na lukwikilu, ti mu ke kwikila ti Nge kele, Mu ke tula na kati-kati ya mpeve ya yimbi yayi ya cancer mpe luzingu ya bébé, Menga ya Yesu Klisto. Na kati-kati ya muntu yina ke kufwaka mpe bébé, Menga, na lukwikilu mu ke tula yawu.” Mpe mu lendaka tuba kima yankaka ve.

¹⁹³ Mu balukaka kaka mpe bandaka na kutambula. Tata landaka munu. Yandi tubaka, “Mpangi Branham, Mfumu me tula na ntima ya munu na kupesa nge mwa bikunku kumi.”

¹⁹⁴ “Oh,” mu tubaka, “mpangi-bakala, banza na yawu ve. Ve.” Mu tubaka, “Mu ke na nsatu ya mbongo ve, mpangi-bakala.”

¹⁹⁵ Yandi tubaka, “Kasi mu bumbaka mwa bikunku kumi.” Oh, mwa mbongo, mu me zimbana ntangu yayi kaka kieleka, mu banza pene ya ba-dollar makumi tanu. Yandi tubaka, “Mfumu tulaka yawu na ntima ya munu na kupesa yawu na nge.”

¹⁹⁶ Mu tubaka, “Mu ke tuba na nge yina. Mu ke kuzwa yawu, mpe na manima beno ke vutula yawu mpe ke pesa yawu na mwa Ricky yina kuna, na facture ya yandi—ya yandi ya lupitalu. Samu ti, beno kele mulongi. Mu zaba yinki ya kele, yina mbongo zola kutuba. Mpe beno, missionnaire, mpe mu zaba ti ya ke lomba mbongo. Mpe beno kele na dibuta, mpe ba-facture yayi nyonso ya dokotolo. Tula yawu mbala mosi na facture ya mwana Ricky.”

¹⁹⁷ Yandi tubaka, “Mu zola ve kusala yawu, Mpangi Branham. Ya kele ve samu na kufuta badokotolo. Ya kele samu na kufuta milongi.”

¹⁹⁸ Mpe mu tubaka, “Yinga, kasi mu ke vutula yawu na nge.” Mpe mu mangaka yawu.

¹⁹⁹ Mpe mu kwendaka na yinzo, mpe na kati ya dyambu ya bangunga fyoti, bambwanga ya yandi me vutuka, mpe ludima ya yandi me vutuka na kisika ya yawu ya kulunga. Nzambi belusaka mwa mwana yina. Ba katulaka lusibu na suka yina mu katukaka, na laka ya yandi.

²⁰⁰ Yawu pesaka boma na Côte Ouest nyonso. Dokotolo ya lukumu tindaka mwana ya yandi, na mutekolo ya yandi. Mpe bawu kangaka nzila, ntama mingi, bakilometele makumi sambanu na tanu to makumi nana, na Pasadena, mpe zengaka nzila kisika mu zolaka luta, samu na kusambila samu na bébé yina vwandaka na ba-spasme na yintu. Ba salaka yandi ntumbu ya penicilline, mpe salaka cancer na kukwiza na nsalulu na ntumbu ya penicilline na luketo ya yandi. Mpe mu ke kwikila ti Mfumu belusaka yawu.

²⁰¹ Mpe ntete mu katuka yinzo, alo-alo dilaka, landilaka na kudila. Mpangi Arganbright, mu kuwaka yandi kuswana na muntu mosi, yandi tubaka, “Ve, mu lendaka sala yawu ve.”

²⁰² Kaka na yina mu vwandaka kota na ditoma, ya vwandaka na mwa ditoma break yina kwizaka. Nani ya vwandaka kasi mpangi ya munu ya bakala ya Mexique mpe kento ya yandi! Bawu zole vwandaka dila kaka mpe vwandaka kembila Nzambi. Yandi tubaka, “Mpangi Branham, mu me nata kikunku ya kumi yayi na nge.”

²⁰³ “Oh,” mu tubaka, “mpangi-bakala, mu lenda kuzwa yawu ve.” Mu tubaka, “Mu lenda kaka ve kusala yawu.”

Yandi tubaka, “Kasi mu me nata yawu na nge.”

Yandi tubaka, mu tubaka, “Mu tubaka na nge na kutula yawu na zulu ya facture ya Ricky.”

²⁰⁴ Yandi tubaka, “Na suka yayi, ntangu mu kwendaka samu na kupesa dokotolo kikunku ya kumi yayi, samu na kukwenda na zulu ya facture ya Ricky, dokotolo tubaka, ‘Nge ke defa munu kima ve.’ Yandi tubaka, ‘Mu vwandaka na kima ve ya kusala na yawu.’ Yandi tubaka, ‘Yina kele phenome ya nene.’ Yandi tubaka, ‘Mu . . . Nge ke defa munu ata mpata mosi ve.’” Na yawu yandi tubaka, “Baka yayi, Mpangi Branham. Mfumu me tuba na munu ti nge zolaka baka yawu.”

²⁰⁵ Mu banzaka, “Oh, mu lenda ve.” Mu tubaka, “Mfumu, mu ke na nsatu ya kusala yawu ve.”

²⁰⁶ Na yina kima mosi kwizaka na munu. Yesu telemaka kilumbu mosi, yandi talaka babakala ya mvwama ke na tula mbongo ya bawu ya kulutila mingi. Oh, bawu vwandaka na mingi, na yawu bawu vwandaka pesa mingi. Mpe mwa mufwidi ya kento kwizaka na ba-cent tatu, mpe ya vwandaka nyonso yina vwandaka na yandi. Ya kele nyonso yina vwandaka na yandi na kuzingila, mpe yandi losaka yawu na kati. Ntangu yayi yinki beto zolaka sala? “Oh, mpangi-kento, kusala yawu ve. Huh-uh. Beno zaba, beto ke na nsatu ya yawu ve. Beno losa yawu ve. Yawu yina kaka ke zingila.” Kasi Yesu bikaka kaka yandi kukwenda na ntuala mpe kusala yawu, samu ti, “Ya kele ya kusakumuka mingi na kupesa na kisika ya kuzwa.”

²⁰⁷ Mu kele na mwa bikunku ya kumi. Mu zaba ve yinki ya kusala na bawu. Mu ke tula yawu kisika mosi kuna, na kisalu mosi samu na nkembo ya Nzambi, kisika mosi na yina mu lenda sala.

²⁰⁸ Yinki ya kele? Ya kele Nkembo ya Nzambi. Ya kele Ngolo ya Nzambi. Bivudi ke na kubwa; Klisto ke na kumonika, ya kele samu na yina bidimbu mpe mambu ya ngitukulu ke na kumonana. Ya kele Nsemo yango ya nene ya Mwana ke na kulakisaka na bambwetete ya suka, na kubeluka na mapapu ya Yandi. Mpe kana Yandi ke nata kubeluka na kifwani ya Mvwandulu ya Yandi, yinki Yandi ke sala ntangu Yandi ke kwisa na kati ya Muntu? Banzutu yayi ya kubeba ya luzolo ke soba mpe ke salama mutindu na Nzutu ya Yandi Mosi ya nkembo. Yinki ya ke vwanda ntangu Yandi ke kwiza? Tii Yandi ke kwiza, beto

ke vutula matondo samu na Nsemo ya Mwana ya Mvwandulu ya Yandi, mutindu bambwetete ya suka ke mata bibaka ya Nkembo, mpe ke vwanda kuna samu na kupesa mbote Nkwizulu ya Yandi na ngunga yayi ya mudidi.


Beto sambila.

²⁰⁹ O Mfumu, beto zola kaka Nge mingi tii, Mfumu, ya ke na kutuba ve bilumbu yikwa . . . Ata mbala mosi ve ti beto ke lemba na kupesa kimbangi ya balukumu ya Nge. Kasi ngunga kele awa ntangu yayi, ya kele na bantu ya kubela yina ke na kuingila. Nge zaba bimbangi yayi. Yawu kele, landila mutindu mu zaba, Mfumu, kieleka ya kieleka. Ya kinati-mpepo yina vwandaka ya kutelama kuna, vwandaka lakisa mutindu yandi lendaka telama na makulu ya yandi, mpe bakondisyo nyonso yina nzutu ya yandi vwandaka; mpe yandi futikaka pantalon ya yandi mpe lakisaka mabolongo mpe makulu ya yandi nyonso ya kumwangana mpe ya kufuluka na bidimbu, kisika badokotolo mekaka na kuvutula mikwa kintwadi. Nge monaka kento ya kutelama kuna na kizizi ya yandi ya kupakula, mpe yandi na kusukulaka yawu na maza ya yandi ya meso ya kyese, mutindu yandi tubaka na kimbevo ya yandi ya arthritis belukaka na Ngolo ya Nge. Mpe ya mwa bébé yina ya luzolo, mpe kimbangi ya tata mpe bayina vwandaka kuna.

²¹⁰ Ntangu yayi, Mfumu, Nge kele kaka nene awa na suka yayi, awa na tabernacle, mutindu Nge kele kisika nyonso na yinza. Mpe Nge silaka ti kisika beto ke kutana kintwadi, ti Nge ke vwanda na kati ya beto. Ntangu yayi beto ke bokila bambevo yina Nge me fidisa na beto na suka yayi. Mpe beto ke sambila samu na bawu, mpe beto ke sambila na bantima ya beto ya muvimba, kisambu ya lukwikilu. Mpe bika ti Nge vulusa bambevo mpe kuvumbula bawu. Mpe kana bawu salaka masumu, lemvokila bawu, Tata, mutindu beto ke funguna bafoti ya beto mosi na yankaka, mpe beto ke sambila mosi samu na yankaka. Mpe Nge tubaka, “Kisambu ya tiya, ya muntu ya kusungama kele na luvalu mingi.”

²¹¹ Beto zaba mosi ya kuvwanda awa na beto na suka yayi, kaka mama ya ntwenya na bana yayi ya fyoti. Mfumu, landila badokotolo, yandi me kuma pene-pene ya nsuka ya nzyetolo ya yandi. Kasi beto ke sambila, Nzambi, ti Nge ke telama na kati-kati ya yandi mpe mbeni yina. Mpe ntangu beto ke pakula yandi mpe ke sambila samu na yandi, bika ti Ngolo ya Nge kusimba moyo yina ya yandi. Yina ke nata lukwikilu mpe luvukulu. Mpe bika yandi vutuka na yinzo mpe yandi beluka, mpe yandi pesa lukumu, mpe yandi vwanda kifwani ya Mbwetete ya Suka, samu na nkembo ya Nzambi. Amen.

²¹² Mpangi Mercier, ntangu yayi, na yina beto ke baka bantu yayi na nzila ya malaka, bantu ke na kwiza. Beto ke bokila kaka

lutangu yayi. Mpe bawu keke ya kutula na liste ya bayina ba ke sambidila. 

58-1130 Sintidi, Yinki Nge Ke Tuba Samu Na Mpimpa?
Branham Tabernacle
Jeffersonville, Indiana U.S.A.

KIKONGO-KITUBA

©2024 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kiasadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org